

2013-imi aningaasanut inatsisissatut siunnersuut

pillugu

Inatsisartut Aningaasaqarnermut Akileraartarnermullu Ataatsimiititaliaata

ILASSUTITUT ISUMALIUTISSIISSUTAA

Inatsisissatut siunnersuutip pingajussaaneerpeqarnerani saqqummiunneqartoq

Aningaasaqarnermut Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Andreas Uldum (Demokraatit), siulittaasoq
Inatsisartunut ilaasortaq Olga P. Berthelsen (Inuit Ataqatigiit), siulittaasup tullia
Inatsisartunut ilaasortaq Aqqaluaq B. Egede (Inuit Ataqatigiit)
Inatsisartunut ilaasortaq Naaja Nathanielsen (Inuit Ataqatigiit)
Inatsisartunut ilaasortaq Per Berthelsen (Siumut)
Inatsisartunut ilaasortaq Finn Karlsen (Siumut)
Inatsisartunut ilaasortaq Siverth K. Heilmann (Atassut)

Imarisaanut nalunaarsuut:

Inatsisissatut siunnersuutip pingajussaaneerpeqarnerani saqqummiunneqartooq	1
1. Aallaqqaasiut.....	3
2. Aningaasaqarnermut Akileraartarnermullu Ataatsimiititaliap apeqquatai/oqaaseqaatai aalajangersimasut – suliassa qarfinnut agguataarlugit	5
2.1 Suliassa qarfik 10-12 Naalakkersuisut Siulittaasuut	5
2.2 Suliassa qarfik 30 Isumaginninnermut, Kultureqarnermut, Ilageeqarnermut Naligiissitaanermullu Naalakkersuisooq.....	8
2.3 Suliassa qarfik 62-66 Inuussutissarsiornermut Suliffeqarnermullu Naalakkersuisooq	9
2.4 Suliassa qarfik 77 Nunamut Namminermut, Pinngortitamut Avatangiisinullu Naalakkersuisooq	9
2.5 Suliassa qarfik 80-89 Ineqarnermut, Attaveqarnermut Angallanermullu Naalakkersuisooq ...	11
3. Aningaasaliissutinut allannguutissatut siunnersuutit	12
3.1 Sammisaaq 1 – Aaqqissuinikkut allannguutit, aappassaaneerineq.....	13
3.2 Sammisaaq 2 – Missingersuutinut sunnuteqanngitsumik allannguutit, aappassaaneerineq.....	17
3.3 Sammisaaq 6 – Teknikkikkut allannguutit, pingajussaaneerineq.....	18
3.4 Sammisaaq 7 – Missingersuutinut sunnuteqanngitsumik allannguutit, pingajussaaneerineq ..	19
3.5 Sammisaaq 8 – Isertitaqarnerunissamik inatsisitigullu aningaasartuutinit pisussaaffigisanit naatsorsuutit, pingajussaaneerineq.....	20
3.6 Sammisaaq 9 – Ujaasinissamut annaassiniarnissamullu upalungaarsimaneq	21
3.7 Sammisaaq 10 – Aningaasartuuteqarnerunissamik kissaatit, pingajussaaneerineq.....	22
3.8 Sammisaaq 11 – Sanaartornermi nussuineq, pingajussaaneerineq.....	23
3.9 Sammisaaq 12 – Akileraartarnermik allanngortiterineq aamma aaqqissuusseqqinnermut atugassatut aningaasaliissutit	24
3.10 Sammisaaq 13 – Ilinniartitaanermi nussuineq	26
3.11 Sammisaaq 14 – Suleriaaseq pillugu Ataatsimiititaliamit allannguutissatut siunnersuut.....	27
3.12 Sammisaaq 15 – Aningaasaqarnermut Ataatsimiititaliamit allannguutissatut siunnersuutit	27
4. Oqaasertaliussanut allannguutissatut siunnersuutit.....	27
4.1 Naalakkersuisut oqaasertaliussanut allannguutissatut siunnersuutaat	27
5. Aningaasaqarnermut Ataatsimiititaliap kaammattuutai.....	29
6. Allannguutissatut siunnersuutit aningaasatigut kingunissaat.....	29
7. Ikinnerussuteqarluni oqaaseqaat	30
8. Aningaasaqarnermut Ataatsimiititaliamit inassuteqaatit	30

Ilanngussanut takussutissiaq:

(Aappassaaneerinnermut ataatsimiititaliap isumaliutissiissutaanit nangitaaq)

- P. Naalakkersuisut aningaasaliissutinut allannguutissatut siunnersuutaat nutaat (Allannguutissatut siunnersuutit nr. 95-imit 154-imit)
- Q. Naalakkersuisut oqaasertaliussanut allannguutissatut siunnersuutaat nutaat (Allannguutissatut siunnersuutit nr. 155-mit 160-mut).
- R. Ulloq 12. oktober 2012-imi apersuinnermut malitseqartitsissutitut Aalisarnermut, Piniarnermut Nunalerinnermullu Naalakkersuisup allagai 29. oktober 2012-imeersut.
- S. Ulloq 19. oktober 2012-imi apersuinnermut atatillugu apeqqutinut akissutitut Nunamut Namminermut, Pinngortitamut Avatangiisinullu Naalakkersuisup allagai 6. november 2012-imeersut.

- T. 2013-imi aningaasanut inatsisissatut siunnersuummut isumaliutissiissut tunngavigalugu Nunamut Namminermut, Pinngortitamut Avatangiisinullu Naalakkersuisup allagai 6. november 2012-imeersut.
- U. 2013-imi aningaasanut inatsisissatut siunnersuummut isumaliutissiissut tunngavigalugu Ilaqtariinnermut, Ilageeqarnermut, Kultureqarnermut Naligiissitaanermullu Naalakkersuisup allagai 7. november 2012-imeersut.
- V. Eqqagassanik ikuaallaaneq pillugu qulaajaalluni suliniummik ilisimatitsineq pillugu Nunamut Namminermut, Pinngortitamut Avatangiisinullu Naalakkersuisup allagai 7. november 2012-imeersut.
- W. 2013-imi aningaasanut inatsisissatut siunnersuummut isumaliutissiissut tunngavigalugu Ineqarnermut, Angallannermut Attaveqarnermullu Naalakkersuisup allagai 8. november 2012-imeersut.
- X. 2013-imi aningaasanut inatsisissatut siunnersuummut isumaliutissiissut tunngavigalugu Aningaasaqarnermut Naalakkersuisup allagai 8. november 2012-imeersut.
- Y. 2013-imi aningaasanut inatsisissatut siunnersuummut isumaliutissiissut ilanngussaq naapertorlugu ataatsimiititaliap apeqqutaanut 3.6.e-mut akissutitut Naalakkersuisut Siulittaasuata allagai 8. november 2012-imeersut.
- Z. 2013-imi aningaasanut inatsisissatut siunnersuummik suliarinninnermut ataatsimiititaliap apeqqutaanut Naalakkersuisut akissutaanik ilisimatitsissutitut Nunanut Allanut Sillimaniarnermullu Ataatsimiititaliap allagai.
- Æ. Suleriaaseq pillugu Ataatsimiititaliap allannguutissatut siunnersuutaanut missingersuutitut ilanngussaq (allannguutissatut siunnersuut nr. 161)
- Ø. Aningaasaqarnermut Ataatsimiititaliap allannguutissatut siunnersuutaanut missingersuutitut ilanngussat (allannguutissatut siunnersuutit nr. 162 aamma 163)
- Å. Ineqarnermut, Attaveqarnermut Angallannermullu Naalakkersuisumik apersuinissamut aggeqqusissut 10. november 2012-imeersoq kiisalu apersuinermit allakkiaq.
- AA. Allannguutissatut siunnersuut nr. 136 pillugu Naalakkersuisut iluarsiiissutaat 11. november 2012-imeersoq.

1. Aallaqqaasiut

Aningaasanut inatsisissatut siunnersuut Inatsisartunit marlunngornermi ulloq 6. november 2012-imi aappassaaneerqarpoq. Siunnersuummik aappassaaneerinermi siunnersuut Aningaasaqarnermut Akileraartarnermullu Ataatsimiititaliamit suliareqqitassanngorlugu innersuunneqarpoq.

Aningaasanut inatsisissatut siunnersuummik Inatsisartut aappassaaneerinerat tunngavigalugu allannguutissatut siunnersuutit allanik 66-inik Naalakkersuisut tallimannngornermi ulloq 9. november 2012-imi nassiussipput, tak. ilanngussaq P aamma Q.

Ulloq 12. oktober 2012-imi apersuineq tunngavigalugu Aalisarnermut, Piniarnermut Nunalerinerimullu Naalakkersuisoq paasissutissanik ilassutaasunik nassiussivoq, tak. ilanngussaq R.

Ulloq 19. oktober 2012-imi apersuinermit apeqqutit ataatsimiititaliamit uteqqinneqarnerannut akissutit Nunamut Namminermut, Pinngortitamut Avatangiisinullu Naalakkersuisumit nassiunneqarput, ilanngussaq S.

Inatsisissatut siunnersuutip matuma aappassaaneerneqarnissaanut isumaliutissiisummut nangissutitut allakkat Nunamut Namminermt, Pinngortitamut Avatangiisinullu Naalakkersuisumit nassiunneqarput, ilanngussaq T-tut ilanngunneqarput.

Inatsisissatut siunnersuutip matuma aappassaaneerneqarnissaanut isumaliutissiisummut nangissutitut allakkat Ilaqutariinnermt, Ilageeqarnermt, Kultureqarnermt Naligiissitaanermullu Naalakkersuisumit nassiunneqarput, ilanngussaq U-tut ilanngunneqarput.

Eqqagassanik ikuallaaneq pillugu qulaajaalluni suliniummik ilisimatitsineq pillugu allakkat Nunamut Namminermt, Pinngortitamut Avatangiisinullu Naalakkersuisumit nassiunneqarput, tak. ilanngussaq V.

Inatsisissatut siunnersuutip matuma aappassaaneerneqarnissaanut isumaliutissiisummut nangissutitut allakkat Ineqarnermt, Angallannermt Attaveqarnermullu Naalakkersuisumit nassiunneqarput, ilanngussaq W-tut ilanngunneqarput.

Inatsisissatut siunnersuutip matuma aappassaaneerneqarnissaanut isumaliutissiisummut nangissutitut allakkat Aningaasaqarnermt Naalakkersuisumit nassiunneqarput, tak. ilanngussaq X.

2013-imi aningaasanut inatsisissatut siunnersuummut isumaliutissiisummut ilanngussaq A-mi ataatsimiititaliap apeqqutaanut 3.6.e-mut akissutitut allakkat Naalakkersuisut Siulittaasuannit nassiunneqarput, tak. ilanngussaq Y.

2013-imi aningaasanut inatsisissatut siunnersuummik suliarinninnermt Nunanut Allanut Sillimaniarnermullu Ataatsimiititaliap apeqqutaanut Naalakkersuisut akissutaat pillugu ilisimatitsisut Nunanut Allanut Sillimaniarnermullu Ataatsimiititaliamit nassiunneqarpoq, tak. ilanngussaq Z.

Naalakkersuisut pingajussaaneerinissamut allannguutissatut siunnersuutaasa ilaat ataasiakkaat pillugit Aningaasaqarnermt Ataatsimiititaliaq Ineqarnermt, Attaveqarnermt Angallannermullu Naalakkersuisumik ulloq 11. november 2012-imi apersuivoq, tak. ilanngussaq Å.

Allannguutissatut siunnersuummut nr. 136-imut iluarsiiisummik Naalakkersuisut ulloq 11. november 2012-imi nassiussippat, tak. ilanngussaq AA.

Inatsisartut Suleriaaseq pillugu Ataatsimiititaliaata suliassaqarfik 01 pillugu allannguutissatut siunnersuut arfininngornermi ulloq 10. november 2012-imi nassiuppaa, tak. ilanngussaq Æ.

Kiisalu allannguutissatut siunnersuutininik marlunnik Aningaasaqarnermt Ataatsimiititaliaq isumaliutissiisummi saqqummiussivoq, tak. ilanngussaq Ø.

Tamanna tunggavigalugu aningaasanut inatsisissatut siunnersuutip Inatsisartunit pingajussaaneerneqarnissaanut Aningaasaqarnermt Ataatsimiititaliaq matumuuna isumaliutissiisuteqarpoq.

2. Aningaasaqarnermut Akileraartarnermullu Ataatsimiititaliap apeqquatai/oqaaseqaatai aalajangersimasut – suliassaqarfinnut agguataarlugit

2.1 Suliassaqarfik 10-12 Naalakkersuisut Siulittaasuut

Ataatsimiititaliap 4. september 2012-imi allakkatigut apeqquataanut Naalakkersuisut Siulittaasuata apeqquummut 3.6.e-mut akissuteqarluni allagaa 8. novemberimeersoq aallarniutigalugu innersuussutigineqarpoq, tak. ilanngussaq Y.

Namminersorlutik Oqartussat aktiaateqarluni ingerlatseqatigiiffiutai

Apeqquut 3.6e matuma kinguliani allassimasoq Aningaasaqarnermut Ataatsimiititaliamit apeqqutigineqarpoq, taannali ataatsimiititaliap apeqquataasa sinnerisa septemberip naanerani akineqarnerannut ilanngullugu ajoraluartumik Naalakkersuisunit akineqarsimanngilaq:

”Royal Arctic Line A/S-ip misissuiffigeqqissaarneratigut Mantec ApS-ip annikillisaaffiusinnaasut pisariillisaaffiusinnaasullu 30 mio. kr.-inik nalillit suussusersinnaasimmagit assut iluarisimaaritsik Aningaasaqarnermut Ataatsimiititaliap Inuussutissarsiornermullu Ataatsimiititaliap siora aningaasanut inatsisip suliarineqarneranut atatillugu oqaatigaat. Ingerlatseqatigiiffinni allani sipaaruteqarnissamik periarfissanik taamaattunik peqarnersoq pillugu qulaajaanermik kinguarsaanertaqanngitsumik aallartitseqqullugit Naalakkersuisut ataatsimiititalianit kaammattorneqarput, tamatumani Tele Greenland A/S-ip aamma KNI A/S-ip misissuinernik taamaattunik aallartitsiffiginissaat naleqquttutut ataatsimiititaliamit aalajangersimasumik tikkuarneqarluni. Kaammattuut taanna Naalakkersuisunit qanoq tigussaasumik malitseqartinneqarpa aammalu tamanna qanoq tigussaasumik angusaqarfiuva? Tassunga atatillugu allaffissornikkut sipaarutissat takussutissinneqarnissaat siunertaralugu nunatsinni pisortat ingerlatsiviisa sinnerisa ukiuni makkunani sipaarutigisaasa assingunik ingerlatseqatigiiffiit Namminersorlutik Oqartussanit tamakkiisumik pigineqartut ukiumut assersuutigalugu 2 procentimik sipaaruteqarnissamik peqquneqarnissaannik Aningaasaqarnermut Ataatsimiititaliap siunnersuutaa Naalakkersuisunit qanoq tigussaasumik malitseqartinneqarsimanersoq paasissutissiissutigineqassasoq kissaatigineqarpoq. Taamatut peqqussuteqarnek aktiaateqarluni ingerlatseqatigiiffiit pillugit inatsimmi tunngavinnik unioqqutitsinerusoq pillugu akissuteqaannarnissaq kissaatigineqanngimmat ataatsimiititaliamit siumungaaq oqaatigineqassaaq, tassami ersarilluinnartumik taamaattoqanngimmat.”

Naalakkersuisut Siulittaasuata allakkatigut 8. november 2012-meersutigut paasissutissiissutigaa Namminersorlutik Oqartussat aktiaateqarlutik ingerlatseqatigiiffiutaanni pissutsit pingaernerit Naalakkersuisunit isummerfigineqartartut, taakkunungalugu ilaallutik taakku ineriartornerat, taakkunani piginnittuuneq aammalu namminersortunngorsaanissamut iliuuserilersaarneqarsinnaasut. Piginnittutut oqartussaasutullu inissisimanerup erseqqissumik avissaartinneqarsimanagera qulakkeersimallugu aammalu piginnittuunermut tunngasumik periusissiorsimallutik Naalakkersuisut isumaqarput. Ilanngullugu paasissutissiissutigineqarpoq:

”... Pitsanngorsaatit tamakku ingerlatseqatigiiffinni annikillisaanissamik taamalu sulisut ikilisinneqarnissaannik piumasaqaatitaqarsimapput. Ineriartorneq taamatut sammiveqaannassasoq naatsorsuutigineqartariaqarpoq taamaattumillu suliffissaqartitsiniarnermut tunngassuteqartutigut politikkikkut

ingerlatsisoqarnissaanik pisariaqalersitsilluni.

Ingerlatseqatigiiffinni kisermaassinermut assingusumik ingerlatsiffiusuni aningaasartuutaasartunut aamma sullisseriaatsinik ineriartortitsinermut tunngasut sammineqarnissaat pingaaruteqartorujussuvoq. Aningaasartuuteqarfiit pisariaqanngitsuusimasinnaasut naammassisaqarpiarfiunngitsumillu ingerlatsinerit innuttaasunut suliffeqarfinnullu allanut taamalu aamma nunap unammillersinnaassuseqarneranut sunniuteqarnerlussapput. Naalackersuisullu kissaatigaat ingerlatseqatigiiffinni akit aningaasarsiallu killiliisinnaassuseqarpaluttumik ineriartortitsiviussasut. Aningaasarsiat nalinginik qaffaasoqassappat taama iliorneq tunisassiornikkut qaffatsitsisimanermik tunngaveqartariaqarpoq.

Naalackersuisut ingerlatseqatigiiffinnut aalajangersimasumik pisariillisaanermut akiligassaliisimangillat, parlattuanilli piginnaasaqarluartutut siulersuisut ingerlatsiviit inuiaqatigiinni suliassanik isumagisagaannut naleqqiullugit ingerlatseqatigiiffiit pitsaanerpaanngortinniarnissaannik alaatsinaataqassasut naatsorsuutigalugu. Taamaalillutik ingerlatseqatigiiffiit inuiaqatiginnit suliakkiissutaasunut, akinut appasissunut, attaveqarfinnut pitsaasunut il.il. atuuffigisanut naleqqiullugit ingerlatsinerminnik pitsaanerpaanngortitsinissaat alaatsinaanneqarput. Taamaalilluni sullissinermik akigititaqarnani pisariillisaanerit pisannginnerat, pisariillisaanerilli tunisassiaqarsinnaasutsimik qaffassaanernik angusaqarniarluni pisarnissaat siunertarineqarpoq.

Ingerlatseqatigiiffinni ineriartornermik malittarinnissinnaaniarlutik ingerlatseqatigiiffinnut ataasiakkaanut anguniagassanik aalajangersaaniarlutik Naalackersuisut siulersuisunik suleqateqarput. Anguniakkaniipput kisitsisit pingaarutillit naatsorsuinermut tunngasut tigussaasut, soorlulusooq anguniakkat tigussaannginnerusut, soorlu sullissinerup inissisimanagera pilersuinermilu isumannaatsuutitsineq...”(s. 2, bilag Y)

Naalackersuisut Siulittaasuata akissuteqarnermini Namminersorlutik Oqartussat aktiaateqarlutik ingerlatseqatigiiffiutai nalinginnaasumik innersuussutigigai ataatsimiititaliamit naatsorsuutigineqarpoq, tassami Royal Arctic Line A/S (RAL), Tele Greenland A/S imaluunniit KNI A/S taaneqanngilluinnarmata. Tamanna assut ajuusaarnarpoq, apeqqummi ingerlatseqatigiiffinnut taakkununga pingasunut immikkut sammititaammat.

Ingerlatseqatigiiffiit Namminersorlutik Oqartussanit pigineqartut pisariillisaavigineqarnissaasa alaatsinaanneqarnera aammalu inuiaqatiginnit suliakkiutit, akikitsunik akeqartitsinissaq, attaveqaatit pitsaasuunissaat il.il. eqqarsaatigalugit ingerlatsinermik pitsanngorsaanissaq alaatsinaaffigeqqullugu siulersuisut peqquneqarsimanerat ataatsimiititaliap ataatsimut isigalugu iluarisimaarpaa. Ataatsimiititaliaq isumaqarpoq sullissinerup qaffasissusia akigalugu pisariillisaanerit ingerlanneqassanngitsut. Arlalinnik anguniagaqarfiusumik pisariillisaanerit ingerlanneqarsinnaapput, assersuutigalugu tunisassiarisartakkat amerlinissaat, atuisunut aammalu

suliffeqarfinnut akigitinneqartut nalinginnaasumik akikinnerunissaat, aningaasartuutit appasinnerusut il.il.

Aningaasartuutitigut sullissinikkullu pitsanngorsaattissat suliffeqarfinnit niuerfinni kisermaassisutullusooq inissisimasunit alaatsinaaffiginngitsoorneqarnissaat aarleqqutigineqarsinnaajuarpoq. Tamanna tunngavigalugu siunertat siuliani taaneqartut anguniarneqarsinnaaqullugit pisariillisaanernik ingerlatsinissamut alaatsinaattunik siulersuisuliinissap qulakkeerneqarnissaanut Namminersorlutik Oqartussat, ingerlatseqatigiiffiit taakku ilaannut arlalinnut piginnittut, innuttaasunut atuisunullu pisussaaffeqartut ataatsimiititaliaq isumaqarpoq. Tamatumani Namminersorlutik Oqartussat taakkulu ingerlatseqatigiiffiutaasa, ingerlatseqatigiiffiit arlallit kisermaassisutut inissisimanertik pisortanillu pigineqarnertik aammalu nunatta aningaasaqarnerani tamarmiusumi aalajangiisuulluinnartumik inissisimanertik tunngavigalugu, inuiaqatigiit aningaasaqarneranni pisussaaffeqarnerat eqqarsaatigineqarpoq. Tamanna inuiaqatigiinnut tunngasumik suliassat, soorlu pilersuinissamik pisussaaffeqarneq imaluunniit attaveqarnermut atortulersuutinik pitsanngorsaanaissaq qulakkeerininnissarluunniit, mianeralugit pissaq. Suliffeqarfiilli ingerlatsinerannik pitsanngorsaanerit annikillisaanerillu maanna ingerlasut inernerit ataatsimiititaliamit maannangaq utaqimaaqqaarumaneqarput.

Royal Arctic Line A/S-imut tunngatillugu Mantec Aps-imit kaammattuutit piviusunngortinneqarnissaannik sulinerup killiffianik tigussaasumik ullut 14-it iluanni nassinneqarnissani ataatsimiititaliap **qinnutigissavaa**. Tassunga atatillugu minnerpaamik 30 mio. kr.-inik naleqartumik pisariillisaanissat naatsorsuutigineqartut ilaat qanoq annertutigisut ullumikkut piviusunngortinneqarsimanersut aammalu pisariillisaanissat sinnerisa piviusunngortinneqarnissaannut pilersaarutit suut utaqqineqarnerisut erseqqissumik tigussaasumillu paasissutissiissutigineqassasoq kissaatigineqarpoq. Tamatumani saniatigut takussutissiamik, ingerlatseqatigiiffiit pisortanit pigineqartut anginerit arfineq marluk taamanikkussamut naatsorsuutini ukuini kingullerni pingasuni aningaasartuuteqartarnikkut aqqissuussaanerannik erseqqissumik takutitsisumik, 2014-imi aningaasanut inatsisissatut siunnersuutip tamanut saqqummiunneqarneranut atatillugu Naalakkersuisut nassiussinissaat ataatsimiititaliamit **kaammattuutigineqarpoq**. Tamanna kisitsisit pingaernerit attuumassutillit atornerisigut pisinnaavoq, taakkununga ilanngullugu iluanaaruteqaatit annertussusiat, sulisumut ataatsimut naatsorsuullugu kaaviiartitat aammalu akiligassalinnit aningaasat qanoq sukkatigisumik pissarsiarineqartarnerisut. Takussutissiaq taamaattoq tunngavigalugu aappaagu aningaasanut inatsisissatut siunnersuummut atatillugu suliaq ataatsimiititaliamit nutaamik naliliiffigineqassaaq.

Kunngearfiup Danmarkip issittoq pillugu iliuusissaa 2011-2020

Nunanut Allanut Sillimaniarnermullu Ataatsimiititaliap allagaa Aningaasaqarnermut Ataatsimiititaliamit aallarniutigalugu innersuussutigineqassaaq, tassani issittoq pillugu 2011-2020-mi iliuusissap piviusunngortinneqarnerani Kalaallit Nunaata peqataanissaa ilaatigut pillugu Naalakkersuisut akissutaat ilisimatitsissutigineqarpoq, tak. ilanngussaq Z.

Iliuusissap piviusunngortinneqarnissaanut aqutsisoqatigiinni Naalakkersuisut eqeersimaarlutik peqataasut aammalu aningaasatigut atugassiissutit iluini suliniutit aningaasalersorneqarsinnaasut ataatsimiititaliamit maluginiarneqarpoq. Sulissaaqarfiit pingaarutillit soorlu uuliaarlerneq, imaatigut angalanermi isumannaallisaanermik pitsanngorsaaneq, nunaviup toqqavia pillugu suliniut, silamik sukunillu nalunaarutit kiisalu imaatigut annaassiniarneq iliuusissaq aqqutigalugu alaatsinaanneqartut ataatsimiititaliaq isumaqarpoq. Suliassaaqarfiit taakku pigaartinneqarnerat ingerlatiinnaqqullugu kiisalu sulinerup killiffianik Nunanut Allanut Sillimaniarnermullu

Ataatsimiititaliamut Inatsisartullu ataatsimiititaliaannut susassaqtunut allanut ilisimatitsissuteqartaqqullugit Naalakkersuisut ataatsimiititaliamit **kaammattorneqarput.**

Kalaallit Nunaata nunani allani sinniisoqarfii

Nunani allani sinniisoqarfinnik allanik pilersitsinissamut 2013-imi aningaasanut inatsisissatut siunnersuummi aningaasanik immikkoortitserneernissamut periarfissaqarnissaa Nunanut Allanut Sillimaniarnermullu Ataatsimiititaliamit neriutigin eqarsimagaluortoq Aningaasaqarnermut Ataatsimiititaliamit maluginiarneqarpoq. Tunngaviusumik isigalugu tamanna Aningaasaqarnermut Ataatsimiititaliamit paasineqarsinnaavoq, tassa Kalaallit Nunaata nunat tamalaat akornanni akisussaassutsimik annertunerusumik tigusiartuaarnissaa aammalu nunat tamalaat akornanni pisussaaffinnik isumaqatigiissutinillu malinninnissaa Aningaasaqarnermut Ataatsimiititaliamit aamma pingaartinneqarmat. Aningaasanut inatsimmi tulleriarilluni pingaarnersuineq eqqarsaatigalugu anguniakkat pingaarnert Aningaasaqarnermut Ataatsimiititaliamit isiginiarneqartariaqarput, tassungalu atatillugu 2013-imi aningaasanut inatsisissatut siunnersuutip aappassaaneerneaqarnissaanut isumaliutissiissummini oqaaseqaatini innersuussutigissallugit, tassanimi Aningaasaqarnermut Ataatsimiititaliaq allammat Nunatta Karsiata ingerlatsinermut aningaasartuutaasa aqunneqarnissaat aalajangiisuusumik pingaaruteqartoq, taamaattumillu isumassarsiat suliniutissallu nutaat tapersersornartinneqarnersut kisiat isumaliutiginagu aammali suliniutissat nutaat taakku suliniutinut aningaasartuuteqarfigeriikkatsinnut sanilliullutik tapersersornarnerunersut isumaliutigissallugu pisariaqartoq, tassami suliniutinik nutaanik aningaasalersuineq aningaasatigut tulleriarinermik allannguinnikkut taamaallaat pissammat.

2.2 Suliassaqarfik 30 Isumaginninnermut, Kultureqarnermut, Ilageeqarnermut Naligiissitaanermullu Naalakkersuisoq

Pissutsit aappassaaneerinissamut isumaliutissiissummi allasimasut pillugit Naalakkersuisup allagai aallarniutigalugit innersuussutigineqarput, tak. isumaliutissiissummut matumunnga ilanngussaq U.

Sulisunik ilinniartitsineq ilinniartitseqqinnerlu pillugit takussutissiaq

Sulisunut aningaasanut inatsit naapertorlugu isumaginninnermut suliassaqarfiup iluani suliassanik isumaginnittunut ilinniartitaanikkut ilinniartitseqqinnikkullu suliniutit pillugit takussutissiaq 2013-imi aningaasanut inatsisissatut siunnersuutip aappaassaaneerneaqarnerata kingorna kingusinnerpaamik ullup ataatsip qaangiunnerani nassiateqqullugu Naalakkersuisut ataatsimiititaliamit qinnuigineqarput.

Suliassaqarfiup 30-ip iluani 2013-imi pikkorissarnerit ilinniartitseqqinnerillu arlalissuit ingerlanneqarnissaat pilersaarutigineqartoq Naalakkersuisup paasissutissiissutigaa, taakkununga ilaapput isumaginninnermut suliassaqarfik pillugu pikkorissartitsinerit ilinniartitseqqinnerillu, ilaqutariinnut paarsisartunut aammalu ilaqutariinnut paarsisartunut sullissisunut pikkorissartitsineq, Socialfaglig diplomuddannelse isumaginninnermi siunnersortinut isumaginninnermilu perorsaasunut. Kiisalu meeqqanut inuusuttunullu annertuumik innarluutilinnut il.il. ulloq unnuarlu angerlarsimaffinni sulisunut pikkorissartitsinissat pilersaarusiorneqarput. Isumaginninnermut suliassaqarfiup iluani ilinniartitsinikkut ilinniartitseqqinnikkullu suliniuteqartoqartoq ataatsimiititaliaq isumaqarpoq, tamannalu ataatsimiititaliamit iluarisimaarneqarpoq. Ineriartorneq pisariaqarneratut annertussusilimmik malinnaavigeqqullugu Ilaqutariinnermut Peqqissutsimullu Ataatsimiititaliaq ataatsimiititaliamit **kaammattorneqarpoq.**

Konto pingaarneq 30.19.17 Kalaallit Nunaata Radiua - KNR

Isertitanik matussusikkamik ingerlatsinissamut KNR-ip periarfissai atorluarneqartut isigineqarnersut aappassaaneerinissamut akissuteqaamminni paasissutissiissutigeqqullugu Naalakkersuisut ataatsimiititaliamit qinnuigineqarput. Tamanna KNR-ip aningaasaqarnerata ingerlatsineratalu misissorneqarneranut ilaatinneqartoq paasillugu ataatsimiititaliamit iluarisimaarneqarpoq, naak tamanna misissuinissamut suliaakkiummi allassimanngikkaluartoq. Misissuinerup ineneri, pilersaarut malillugu 2012-ip naanerani piareertussatut naatsorsuutigineqartut, pillugit ilisimatinneqarnissani ataatsimiititaliap qilanaaraa.

2.3 Suliassaqarfik 62-66 Inuussutissarsiornermut Suliffeqarnermullu NaalakkersuisoqKonto pingaarneq 64.10.17 Nunami inuussutissarsiutinut takornariartitsinermullu tapiissutit

Aappassaaneerinissamut isumaliutissiissut naapertorlugu ataatsimiititaliamit maluginiarneqarpoq Kalaallit Nunaata nunanit allanit ilisimaneqarnerulernissaanut aningaasat Visit Greenlandimit aquneqarunnaartut, Inuussutissarsiornermullu Naalakkersuisoqarfimmut utertinneqarlutik, tassa Naalakkersuisoq naapertorlugu nunatta nunanit allanit ilisimaneqarnerulernissaanut periusissaq takornariaqarnermut aamma inuussutissarsiutinik siuarsaaneermut tunngamat. Ataatsimiititaliarli isumaqarpoq suliassaq Visit Greenlandimit manna tikillugu isumagineqarluarsimasoq aammalu ataatsimiititaliamit tupigusuutigineqarpoq nunatta nunanit allanit ilisimaneqarnerulernissaanut tunngasumik suliassap inissisimaffianik allanngineq sumerpiaq tunngaveqarnersoq. Tamanna tunngavigalugu suliassaq siunissami Visit Greenlandimit imaluunniit Inuussutissarsiornermut Naalakkersuisoqarfimmit isumagineqassanersoq isumaliutigeqqeqqullugu Naalakkersuisut ataatsimiititaliamit qinnuigineqarput.

2.4 Suliassaqarfik 77 Nunamut Namminermt, Pinngortitamut Avatangiisinullu Naalakkersuisoq

Ilanngussaq S naapertorlugu ulloq 19. oktober 2012-imi apersuinermt atatillugu apeqqutit pillugit Naalakkersuisup allagaa aamma ilanngussaq T naapertorlugu pissutsit aappassaaneerinissamut isumaliutissiissummi allassimasut pillugit allakkat kiisalu eqqagassanik ikuallaasarneq pillugu qulaajaalluni suliniut pillugu allakkat aallarniutigalugit innersuussutigineqarput.

Kommunik iluarsaaqqinneq – ukiut sisamat qaangiunneranni

Kommunik iluarsaaqqinnermi anguniakkat ilagisimavaat kommunit allaffissornikkut sipaaruteqarnissaat. Aappassaaneerinissamut isumaliutissiissut naapertorlugu Nunamut Namminermt, Pinngortitamut Avatangiisinullu Naalakkersuisup paasissutissiissutigaa anguniagaq taanna anguneqarsimanngitsoq, akerlianilli aningaasartuutit amerleriarsimasut. Aningaasartuutit 2012-imi ikileriarnissaat missingersuutigineqartoq kiisalu allaffissornermt aningaasartuutit annertuumik nikingaffiutillugit kontot pillugit pilersaarutit allannguuteqarnerat eqqumaffigineqassasoq Aningaasaqarnermt Naalakkersuisup paasissutissiissutigaa (apeqqut 7b, ilanngussaq E, aappassaaneerinermut isumaliutissiissut).

Akissutit taaku assigiinngissuteqarnerat tunngavigalugu kommunit piffissami 2007 – 2012-imi allaffissornikkut tamakkiisumik aningaasartuutaannut takussutissiaq, ukiumi pineqartumi akigitinneqartut aammalu 2012-imi akit aallaavigalugit aningaasartuutinik takutitsisoq, aappassaaneerinissamut isumaliutissiissummi ataatsimiititaliamit qinnutigineqarpoq. Kiisalu akileraartarnermik akiliisitsiniartarnermillu allaffissornikkut aqutsinerup ukiumi pineqartumi akigitinneqartut aammalu 2012-imi akit aallaavigalugit nalinga pillugu kisitsisinik takussutissiaq

imaqassaaq. Tamatumani kommuninik iluarsaaqqinnermut atatillugu kommunit allaffissornermut aningaasartuutaat ikileriarsimanersut amerleriarsimanersulluunniit nalilerneqarsinnaaqqullugu.

Nunamut Namminermt, Pinnngortitamut Avatangiisinullu Naalakkersuisoq Aningaasaqarnermut Naalakkersuisup tapersiutissaanik piniarsimavoq, tak. matuma kinguliani allassimasut.

Tabeli 1 – Kommunit allaffissornermut aningaasartuutaat ukiumi akigititani, mio. kr.

	N 2007	N 2008	N 2009	N 2010	N 2011	M 2012
Allaffissornerq	506,6	504,6	594,9	574,9	585,0	550,0
Tunniussinernut naqqiutit:						
Innarluutillit					-3,3	-3,4
Akiliisitsiniaasarfik		9,5	18,7	19,3	19,6	20,0
Akilararneq	26,3	27,1	28,4	29,3	29,7	30,4
Allaffissornerq, naqqiut	532,9	541,2	642,1	623,5	631,0	597,0

Allagaq: Tabeli 1-imi innarluutilinni, akiliisitsiniaasarfikmi akilararnermilu suliaassanik tunniussinernut naqqiis-sutaapput, tassa susassaarfiit suliarineqarput sulii tunniunneqarsimannngitsutut, taamaasilluni kisitsisit sanilli-unneqarsinnaaqqullugit. Tamanna suliarineqarpoq aningaasat utertinneqarsimasutut saqqumisillugit.

Tabeli 2 – Allaffissornermut aningaasartuutit 2012-imi akit inissisimaf-fiart mio. kr.

	N 2007	N 2008	N 2009	N 2010	N 2011	M 2012
Allaffissornerq, naqqiut	615,7	607,9	686,6	647,1	644,9	597,0

Allagaq: Tabeli 2-mi allaffissornermut aningaasartuutit tamarmiusut 2012-imi akit inissisimaffiannut naatsorsoqqillugit naqqinneqarput, taamaasilluni ukiut ingerlaneranni ineriartornerit piviusut takuneqarsinnaaqqullugit.

Tabelit taakku Aningaasaqarnermut Naalakkersuisumik ulloq 12. oktober 2012-imi apersuinermit ataatsimiititaliamut siusinnerusukku tunniunneqartut asserluinnaraat. Akilaraartarnermik akiliisitsiniartarnermillu allaffissornermut aqutsinerup 2012-imi akit aallaavigalugit nalinga allassimannngilaq, taamaallaalli allaffissornermut aningaasartuutaasimasut. Taamaalillunilu kommunit allaffissornermut aningaasartuutaat amerleriarsimanersut ikileriarsimanersulluunniit ataatsimiititaliamit sulii piviusumik nalilerneqarsinnaanngilaq. Aningaasanut inatsimmik suliarinninnermi Naalakkersuisunit ersarissumik akissutisinissap ajornarsimanera assut ajuusaarnartutut ataatsimiititaliamit isigineqarpoq. Aningaasanut inatsisissatut siunnersuummik Naalakkersuisut ataqatigiissaarinerat ingerlatsinerallu pitsanngortinneqassasoq ataatsimiititaliamit **kaammattuutigineqarpoq**, taamaaliornikkut akissutinik naammanngitsumik imaluunniit ataqatigiissaagaanngitsunik ataatsimiititaliamut nassiussisoqaqqunagu. Takussutissiamik akilaraartarnermik akiliisitsiniartarnermillu allaffissornermut aqutsinerup 2012-imi akit aallaavigalugit nalinganik takutitsisumik suliaqaqqullugit aammalu takussutissiaq taanna Inatsisartunut tamanut nassiateqqullugu Naalakkersuisut ataatsimiititaliamit qinnuigineqarput. Kommunit allaffissornerat pillugu tabel 1-ip ataani kisitsisit iluarsisat taarsiullugit nassiunneqarsinnaapput, taamaalillutik 2012-mi akit aallaavigalugit allassimalersillugit.

Pisortat aningaasaqarnikkut siunissaat pillugu kommunit ingerlaavartumik oqaloqatigineqartartut aammalu pisortat sipaaruteqarnissaat pisariaqartoq kommunit oqaatigisaat Naalakkersuisunit maluginiarneqartut Naalakkersuisut paasissutissiisutigaat. Tamanna tunngavigalugu Naalakkersuisuni taamatullu kommunini allaffissornermut sipaaruteqarnissap aammalu

anigaasartuutiniq sukangasumik aqutsinissap alaatsinaanneqarnera attatiinnaqqullugu Naalakkersuisut ataatsimiititaliamit **kaammattorneqarput**. *Kommunini* allaffissorpeq annertuallaarnerarlugu anigaasartuutaavallaarnerarlugulu Kalaallit Namminersorpeq pillugu Isumalioqatigiissitaata isumaliutissiissummini oqaatigimmagu Anigaasaqarnermut Ataatsimiititaliamit eqqaasitsissutigineqassaaq. Kisitsisit siuliini allassimasut eqqarsaatigalugit taamatut naliliineq suli attuuttut isigineqartariaqarpoq.

Konto pingarneq 77.05.03 Avatangiisit, uuliaarluernernik akiuinnermut atortunik pisinnermut tapiissutit

Uuliaarluernernik akiuinnermut atortut kiisalu assersuutigalugu uuliakunut imaluunniit eqqakkanut uuliamit pisunit tigooraavinnik pilersitsinissamat periarfissat ataatsimiititaliamit apeqqutigineqarput. Nunamut Namminermut, Pinngortitamut Avatangiisinullu Naalakkersuisumit, Ineqarnermut, Attaveqarnermut Angallannermullu Naalakkersuisumit kiisalu Aatsitassanut Pisortaqarfimmit akissutit tiguneqarput.

Tamanna tunngavigalugu uuliakunut tigooraavinnik umiarsualiviit amerlanerpaartaanni ullumikkut pilersitsisoqareersimasoq, tassuunakkullu najukkani umiatsiaaqqat umiarsuillu mikinerit pisariaqartitsinerat matussuserneqartoq ataatsimiititaliamit maluginiarneqarpoq. Eqqagassanik uuliamit pisunit tigooraavinnik pilersitsinissaq siunertamut naapertuutissasoq Aatsitassanut Pisortaqarfimmit paasissutissiissutigineqarpoq, tassa tamanna 2010/2011-mi qillerilluni ujarlernermit atatillugu eqqagassanik Danmarkimut assartuinnermit pitsaanerusumik aaqqiissutaasinnaammat.

Kiisalu sanaartornerup ingerlatsinerullu tungaanit isigalugu tigooraavinnik pilersitsinissaq pisariussanngitsoq Naalakkersuisut paasissutissiissutigigaat ataatsimiititaliap maluginiarpaat. Pilersaarusernerup nalaani immikkut iliuuseqarfiusariaqanngitsumik avatangiisinut inatsit atuuttoq naapertorlugu umiarsualiviit aaqqissuunneqarsinnaapput, tassa nunaminertaq tankimik inissiiviusinnaasoq kisimi pisariaqartinneqarmat.

Ujaasinernit eqqagassanik uuliamit pisunit tigooraavinnik pilersitsinissaq aammalu uuliakunut tigooraavinnik allilerineq umiarsualivinnik aserfallatsaaliuinissamat, allilerinissanut sanaartornissamullu ilanngunneqartariaqartoq ataatsimiititaliap isumaqarpoq. Tigooraaviit taamaattut avatangiisinut pitsaaqutissaat suunersut aammalu anigaasaqarnikkut qanoq pisariaqartitsinersut misissoqqullugu kiisalu akilersinnaassuseqarnerat misissuiffigeqqissaqqullugu Naalakkersuisut ataatsimiititaliamit **kaammattorneqarput**. Tamatumani Naalakkersuisut akunnerminni ataqatigiissaarinnissaat suleqatigiinnissaallu pisariaqarpoq. Anigaasaqarnermut tunngasunik misissuinerup inerneranik ilisimatinneqarnissaq ataatsimiititaliamit qilanaarineqarpoq, tamatumani misissuinerup avatangiisinut tunngasortai Sanaartornermut Avatangiisinullu Ataatsimiititaliamut ingerlanneqarnissaat naatsorsuutigineqarluni.

2.5 Suliassaqarfik 80-89 Ineqarnermut, Attaveqarnermut Angallannermullu Naalakkersuisoq
Pissutsit aappassaaneerinissamat isumaliutissiissummi allassimasut pillugit Naalakkersuisut allagai 8. november 2012-imeersut aallarniutigalugit innersuussutigineqarput, tak. ilanngussaq W.

Illuut A/S

Oqaasertaliussat anigaasanut inatsisini siusinnerusuni ilaatinneqartarsimasut ilanngunneqarnissat siunertaralugu allannguutissatut siunnersuummik Naalakkersuisut saqqummiussinngippata Illuut

A/S-imik ingerlatsinermut qanoq kinguneqassanersoq akissuteqarfigeqqullugu ataatsimiititaliap Naalakkersuisut qinnuigai. Inatsisissatut siunnersuummik Illuut A/S-imut maleruagassiisumik Naalakkersuisut saqqummiussinisaat naatsorsuutigineqarmat oqaasertaliussat 2013-imi aningaasanut inatsisissatut siunnersuummut ilanngunneqanngillat, taannali piffissamut aalajangigaanngitsumut kinguartinneqarpoq aammalu Illuut maannatut aaqqissuusaanermisut iluseqarluni ingerlateqqinneqassanersoq pillugu misissuinerit ingerlanneqarnissaat utaqqineqarluni. 2013-imi taarsigassarsinissaq sanaartornissarluunniit naatsorsuutigineqanngimmat oqaasertaliussat taakku Illuut A/S-ip ingerlanneqarneranut pingaaruteqanngitsut aappassaaneerinissamut akissuteqaamminni Naalakkersuisut akipput. Ilangussaq W naapertorlugu Ineqarnermut, Attaveqarnermut Angallanermullu Naalakkersuisup oqaatigaa Illuut A/S-ip suliffeqarfittut nammineertitatut imaluunniit aqutsisoqarfittut allanngortinneqarnissaata isumaliutiginnissaa pitsaaquteqarsinnaasoq, taamaaliornikkut taarsigassarsinissaq pillugu naalakkersuinikkut tulleriiarilluni pingaarnersiuisoqarsinnaaqqullugu aammalu akiitsorneq tamakkiisumik aqunneqarsinnaaqqullugu. Misissuinerup inernerit pillugit Aningaasaqarnermut Ataatsimiititaliamut aamma Sanaartornermut Avatangiisinullu Ataatsimiititaliamut ilisimatitsissuteqaqqullugit Naalakkersuisut ataatsimiititaliamit **qinuigineqarput**.

3. Aningaasaliissutinut allannguutissatut siunnersuutit

Aningaasanut inatsisissatut siunnersuummut allannguutissatut siunnersuutininik nutaanik 66-inik Naalakkersuisut saqqummiussipput. Taakkunanga 60-it aningaasaliissutinut allannguutissatut siunnersuutaapput 6-illu oqaasertaliussanut allannguutissatut siunnersuutaallutik.

Suleriaaseq pillugu Ataatsimiititaliap aningaasaliissutinut allanngortitanut allannguutissatut siunnersuut ataaseq saqqummiuppaa. Ilangussaq Æ innersuussutigineqarpoq.

Aningaasaqarnermut Ataatsimiititaliap aningaasaliissutinut allanngortitanut allannguutissatut siunnersuutit marluk saqqummiuppai. Ilangussaq Ø innersuussutigineqarpoq

Aappassaaneerinermit allannguutissatut siunnersuutit 4-t sinnerupput. Allannguutissatut siunnersuut nr. 68 Naalakkersuisut kinguartimmassuk malugineqassaaq, taassuma isummerfiginnissaa ataatsimiititaliap pingajussaaneerinissamut kinguartinnikuuaa. Taarsiullugu allannguutissatut siunnersuut nr. 133 Naalakkersuisunit saqqummiunneqarpoq, tak. ilangussaq P. Ilangullugu malugeqquneqarpoq allannguutissatut siunnersuummut nr. 136-imut iluarsissummik Naalakkersuisut nassiussimmata, tak. ilangussaq AA.

Taamaalillunilu pingajussaaneerinissamut allannguutissatut siunnersuutit katillugit 72-iupput.

Aningaasaliissutinut allannguutissatut siunnersuutit sammisanut ukununga immikkoortinneqarsimapput:

- sammisaq 1 Aaqqissuinikkut allannguutit, aappassaaneerineq: allannguutissatut siunnersuutit 2-t
- sammisaq 2 Missingersuutininut sunniuteqanngitsumik allanngutit, aappassaaneerineq: allannguutissatut siunnersuutit 2-t
- sammisaq 6 Pingajussaaneerinninnissamut teknikkikkut allannguutit: allannguutissatut siunnersuutit 14-it
- sammisaq 7 : Pingajussaaneerinninnissamut missingersuutininut sunniuteqanngitsumik allannguutit: allannguutissatut siunnersuutit 18-it

- sammisaq 8 Pingajussaaneerinninnissamut isertitaqarnerunissamik inatsisitigullu aningaasartuutinit pisussaaffigisanit naatsorsuutit: allannguutissatut siunnersuutit 4-t
- sammisaq 9 Ujaasinissamut annaassiniarnissamullu upalungaarsimaneq: allannguutissatut siunnersuutit 2-t
- sammisaq 10 Pingajussaaneerinninnissamut aningaasartuuteqarnerunissamik kissaatit: allannguutissatut siunnersuutit 4-t
- sammisaq 11 Pingajussaaneerinninnissamut sanaartornermi nussuineq: allannguutissatut siunnersuutit 4-t
- sammisaq 12 Akileraartarnermik allanngortiterineq aamma aqqissuusseqqinnermut atugassatut aningaasaliissutit: allannguutissatut siunnersuutit 9-it
- sammisaq 13 Ilinniartitaanermi nussuineq: allannguutissatut siunnersuutit 5-it
- sammisaq 14 Suleriaaseq pillugu Ataatsimiititaliamit allannguutissatut siunnersuut: allannguutissatut siunnersuut ataaseq
- sammisaq 15 Aningaasaqarnermut Ataatsimiititaliamit allannguutissatut siunnersuutit: allannguutissatut siunnersuutit 2-t

Naalakkersuisut aningaasaliissutitut allannguutissatut siunnersuutaat nr. 95-imit nr. 154-imut normoqarput. Naalakkersuisut oqaasertaliussanut allannguutissatut siunnersuutaat nr. 155-imit nr. 160-imut normoqarput.

Suleriaaseq pillugu allannguutissatut siunnersuut nr. 161-imik normoqarpoq.

Aningaasaliissutit pineqartillugit allannguutissatut siunnersuutit ataasiakkaat normui aningaasaliissutitut takussutissiami allassimapput; *ilanngussaq 1*. Aningaasaliissutitut takussutissiat Naalakkersuisut allannguutissatut siunnersuutaannut saarlningorlugit ilanngunneqarput, taakkulu ilassutitut isumaliutissiisummut ilanngussaq P-tut ilanngunneqarlutik.

Oqaasertaliussanut tunngatillugu normuliunneqartoq oqaasertaliussat siornagut allanneqarpoq. Oqaasertaliussat *ilanngussaq 2*-mik taaguuserneqarput. Taakku ilassutitut isumaliutissiisummut ilanngussaq Q-tut ilanngunneqarput.

3.1 Sammisaq 1 – Aqqissuinikkut allannguutit, aappassaaneerineq

Konto pingaarneq 87.00.88 Nunaqarfinni isorliunerusunilu sanaartornermut periusissaq

Aappassaaneerinermi qulequttami tassani allannguutissatut siunnersuummut nr. 29-mut isummernissani Aningaasaqarnermut Akileraartarnermullu Ataatsimiititaliap kinguartippaa. Isumaliutissiisummi ataatsimiititaliaq ima allappoq:

”Konto pingaarnermut matumunnga aningaasaliinermi tunngavigineqartut erseqqissarneqassasut Naalakkersuisut siunnersuutigaat, taamaalilluni sanaartugassanut iluarsagassanullu Nuup, Sisimiut, Ilulissat Qaqortullu avataanniittunut aningaasat atugassanngortinneqartut allassimassalluni. Sulili allassimavoq sanariaannaat Illorput 2100-t tunniunneqarnissaat najukkani ineriartorfiusuni malunnaatilimmillu inissaaleqiffiusuni salliutinneqassasoq. Ammalu allassimavoq sanariaannaat nuttarnersitsiniarnerup ilaatut tunniunneqarsinnaasut. Tamanna konto pingaarnerup illoqarfuit siuariartorfiusut

sisamat avataanni atugassanngortinneqarnissaanik siullertut allasimasumut ilaatigut akerliusutut isumaqarfiginarpoq.

Tamanna tunngavigalugu allannguutissatut siunnersuutip akuerineqarnissaa ataatsimiititaliamit imaaliillaannaq inassutigineqarsinnaanngilaq.

*Siuliani allasimasunut allakatigut itisiliissummik 2013-imi aningaasanut inatsisissatut siunnersuutip Inatsisartunit aappassaaneerneqarnerata kingorna kingusinnerpaamik ullup ataatsip qaangiunnerani Naalakkersuisut Aningaasaqarnermut Ataatsimiititaliamut nassiussissasut ataatsimiititaliamit **qinnutigineqarpoq**. Taassuma tungaanut allannguutissatut siunnersuummut isummernissani ataatsimiititaliap **kinguartippaa**.”*

Ineqarnermut, Attaveqarnermut Angallannernullu Naalakkersuisoq 8. november 2012-imi allakkamini ima paasissutissiivoq:

” Illoqput 2100 illoqarfinni minnerni akunnattumillu angissusilinni, illunut ilaqutariinnut ataatsinut inissianut nunaminertanik amigaateqarfiunngitsuni sananeqartussatut ilusiligaapput. Illoqarfinni annerni sisamani, tassalu Nuummi, Sisimiuni, Ilulissani aamma Qaqortumi inissialiortiternermut pilersaarutinik allanik, tassalu illoqarfinni illunik inissiar-suarnillu anginerusunik – illunik eqimattanik, nuttarnermut siuarsaanermi atorneqartussanik, tamatumalu peqatigisaanik nunaminertat sanaartorfigissarneqarsimasut killeqartut pitsaanerusunik atorneqarnissaannut qulakkeeriffiusunik atuutsitsisoqarpoq. Tamanna tunngavigalugu kontomi pingaarnermi aningaasaliissutit taamaallaat innuttaasut illoqarfuit annerit sisamat: Nuuk, Sisimiut, Ilulissat aamma Qaqortoq, avataanniittut iluaquserneqarnissaannut atorneqarsinnaanissaat inassutigineqarpoq.” (qupperneq I, ilanngussaq W)

Missingersuutininut ilanngussami oqaasertap attatiinnarneqarneratigut najukkat siariartorfiusut pillugit piumasaqaat annertuallaamik salliutinneqassasoq ataatsimiititaliaq sulii isumaqarpoq. Ataatsimiititaliaq isumaqarpoq nunaqarfiit isorliunerusunut siuariartorfiunissamik piumasaqaammik eqquutsitsinngikkaluartut pitsaasunik najugaqarnissamut aamma periarfissaqartariaqartut.

Taamaattumillu allannguutissatut siunnersuummik nr. 161-imik ataatsimiititaliaq saqqummiussivoq, taassumalu allannguutissatut siunnersuut matumani pineqartoq taarsissagaa kissaatigineqarpoq, tak. sammisaq 15 aamma ilanngussaq Ø.

Konto pingarneq 89.72.12 Inissialiassat taartissanillu inissialiortitserneq

Aappassaaneerinermi qulequttami tassani allannguutissatut siunnersuummut nr. 33-mut isummernissani Aningaasaqarnermut Akileraartarnernullu Ataatsimiititaliap kinguartippaa. Isumaliutissiissummi ataatsimiititaliaq ima allappoq:

”Sanaartugassanut pingasunut aningaasaliissutit suliaassat immikkoortiterneranni allanngortinneqarnissaat Naalakkersuisut siunnersuutigaat. Suliassaq nr. 060.34.510, Nuummi inissiat 300-t, 2,5 mio. kr.-inik amerlineqassasoq aammalu ukiumi missingersuusiorfimmi 13,5 mio. kr.-inik amerlineqassasoq qinnutigineqarpoq. Suliassaq nr. 996.34.527, nutarterinerit isarterinerillu assigiinngitsut, 2013-imi 16

mio. kr.-inik ikilineqassasoq aammalu suliassaq nr. 060.34.518, Radiofjeldimi nutaanik sanaartorneq iluarsaanerlu, 2013-imi 13,5 mio. kr.-inik amerlineqassasoq aammalu taakku amerlataqataannik ukiumi missingersuusiorfimmi 2014-imi ikilineqassasoq qinnutigineqarpoq.

Radiofjeldimi sanaartugassat siuartinneqarnerisa kingunerisaanik suliassaq nr. 996.34.527-ip ataani iluarsagassat isatigassallu sorliit kinguartittariaqassanersut ataatsimiititaliamit isumakuluutigineqarpoq. Kiisalu Nuummi inissianik 300-inik sanaartornissamut aningaasat amerlisinneqarnissaannut tungavilersuut erserluserluserinarpoq.

Naggataatigullu suliassaq nr. 060.34.524-imut, Sarfaarsunni inissiat 28-it, suliat allaaserineri allanngortinneqassasut kisaatigineqarpoq. Oqaasertaliussaaqqaartuni allassimavoq inissiat taakku ilinniartut inaattut atorneqassasut aammalu pisariaqartitsineq allanngorpat inissiat ineqarnermut tungasunut nuunneqarsinnaallutik. Ataatsimiititaliarli isumaqartuarsinnarpoq Nuummi ilinniartut inaanik pisariaqartitsineq suli annertoorujussuusoq, taamaattumilu suliassap allaaserinerata allanngortinneqarnissaata siunnersuutigineqarnera ataatsimiititaliamit tupigusuutigineqarpoq.

Tamana tungavigalugu allannguutissatut siunnersuutip akuerineqarnissaa ataatsimiititaliamit imaaliillaannaq inassutigineqarsinnaanngilaq.

*Siuliani allassimasunut allakatigut itisiliissummik 2013-imi aningaasanut inatsisissatut siunnersuutip Inatsisartunit aappassaaneerineqarnerata kingorna kingusinnerpaamik ullup ataatsip qaangiunnerani Naalakkersuisut Aningaasaqarnermut Ataatsimiititaliamut nassiussissasut ataatsimiititaliamit **qinnutigineqarpoq**. Taassuma tungaanut allannguutissatut siunnersuummut isummernissani ataatsimiititaliap **kinguartippaa**.”*

Napasuliaq 10-mi inissiat inissiatut nammineq pigisassatut atorneqarnissaat naatsorsuutigineqarsimagaluartoq maanna sulisunut inissianut atugassanngortinneqarnissaata aalajangiunneqarnera suliaq nr. 060.34.510-mut, Nuummi inissianut 300-nut tungasumut, aningaasaliissutit amerlineqarnerannut pissutaasoq allakkaminni, tak. ilanngussaq W, Naalakkersuisut paasissutissiissutigaat. Taamaattumillu taakku Illuut A/S-imit pigiinnarneqassapput, taamaalillunilu Namminersorlutik Oqartussat taarsigassarsinissamut pisariaqartitsinerat annertuseriarluni.

Suliaq nr. 996.34.527, sumiiffinni assigiinnigitsuni nutarterinerimut isaterinerimullu tungasooq, pillugu konto pingarneq 16 mio. kr.-inik ikilineqassasoq qinnutigineqarpoq, tassa maanna paasinarsereermat INI Byggeteknikimi iluarsaanermut allattoqarfiup, aasimanernik oqunnillu isumaginnittussap, aallarteqqinneqarnissaa naatsorsuutigisamit sivisunerussasoq. Oqummut atatillugu iluarsaanermut periusissaq sinerissami 2014-imi tamakkiisumik atorneqalersimassasoq naatsorsuutigineqarpoq, taamaattumillu Nuummi Radiofjeldimi iluarsaanissamut 13,5 mio. kr.-it nuunneqarnissaat qinnutigineqarput, tassanimi oqoqartoq aamma paasineqarsimammat. Aappassaaneerinissamut isumaliutissiissummi ataatsimiititaliap pingaartillugu oqaatigisaa, tassalu oqummut tungatillugu iluarsartuussinerimi sulisut sanasullu piginnaasallit atorneqarnissaasa qanoq pingaartigenera, tassuunakkut naqissuseqqinneqarpoq. Illoqarfinni, nunaqarfinni isorliunerusunilu

oqoqarnera pissutigalugu iluarsaanerit pisariaqanngitsumik kinguarsarneqannginnissaat alaatsinaaqullugu Naalakkersuisut ataatsimiititaliamit **kaammattorneqarput**.

Suliaq nr. 060.34.527, Sarfaarsunni inissiat 28-it, ilinniartunut inissianiit inissianut ilinniartunut atugassianut allanngortinneqarnissaat Naalakkersuisunit kissaatigineqarpoq. Taamaalillunilu ineqarnermut akiliutinik nalinginnaasunik akileeqqussuteqartoqarsinnaavoq aammalu aserfallatsaaliinissamat aningaasanik taakkunannga immikkoortitsisoqarsinnaalluni. Taamaaliornikkut nalinginnaasunik attartortunut atugassarititaasut assingunik atugassaqarlutik ineqarnermut tapiissutinik iliniartut pissarsisinnaalissapput. Ilinniartunut inissianiit inissianut ilinniartunut atugassianut allanngortinneqarnissaannut tunngaviit ataatsimiititaliamit tupigusuutigineqarput, aammalu assut isumakulunnartillugu taamatut allannguinuq ilinniartunut inissiat siunissami "inissianut ilinniartunut atugassianut" allanngortinneqartalnissaannut aqutissiuussissappat. Ilinniartut ilinniagaqarneranni tapersorsorumallugit ilinniartunut inissiat akikitsut neqeroorutigineqarnissaat naalakkersuinikkut aalajangigaavoq. Naalakkersuinikkut taama tunngaviusumik aalangiinernik allanngortitsisinnaaneq ilinniartunut inissianik suliamut atatillugu pissanngitsaq ataatsimiititaliaq isumaqarpoq. Ilinniartunut inissianiit inissianut ilinniartunut atugassianut allanngortinneqarnissaannut tunuliaqutaasut pingajussaaneerinissamat akissuteqaammi itisileqqullugit Naalakkersuisut ataatsimiititaliamit **qinnuigineqarput**, tassungalu ilanngullugu ilinniartunut inissiatut neqeroorutigineqartartunik siunissami allannguinissaq Naalakkersuisunit siunertarineqartarnerisq kiisalu ilinniartunut inissiamut taarsiullugu ilinniartup inissiamik attartortittakkamik ineqarnermut tapiissutitalimmik attartorneratigut aningaasaqarnikkut assigiinnngissut sumiinnerisq.

Suliassani allanngortitsinerit malunnaateqassanngitsut Naalakkersuisup ilanngullugu paasissutissiissutigaa, tassa sanaartorerup sukkassusianit pilersaarusanillu nikisitsisarnermit malunnarunnaarsinneqassammata. *"Taamaakkaluartoq aningaasaliissutit "atorneqaannarnissaannut" taarsiullugu naleqarneruffiitut atorneqarnissaat Naalakkersuisut pingaartippaat."* (qupperneq 3, ilangussaq W). Naalakkersuisup oqariartuutaa Sanaartugassanut Iluarsagassanullu Aningaasaateqarfimmit aningaasaliissutinik atuinerup piviusorsiornerunissaanik Aningaasaqarnermut Ataatsimiititaliap kaammattuutaanut naapertuuppoq.

Nuummi imaluunniit illoqarfiit siuariartorfiusut sinnerini inissialiornissamik pilersaarutit kisimik siuartinneqannginnissaat aammalu illoqarfiit siuariartorfiusut avataanni inissialiornissamik pilersaarutit kisimik kinguartinneqannginnissaat Naalakkersuisunit immikkut eqqumaffigineqartariaqartoq ataatsimiititaliaq isumaqarpoq. Aningaasaliissutit naleqarnerpaaffimmini atorneqarnissaat pingaaruteqarpoq, tamannali inuit illoqarfinni siuariartorfiunngitsuni najugaqartut isornaatsunik ineqarnissamat periarfissaqartinneqarnissaat mianeralugu pissaaq.

(Allannguutissatut siunnersuut nr. 33)

Aappassaaneerineri sammisaq 1-p ataani allannguutissatut siunnersuut nr. 29 **itigartinneqassasoq** Aningaasaqarnermut Akileraartarnermullu Ataatsimiititaliamit **inassutigineqarpoq**.

Sammisaq 1-p ataani allannguutissatut siunnersuut nr. 33 **akuerineqassasoq** Aningaasaqarnermut Akileraartarnermullu Ataatsimiititaliamit **inassutigineqarpoq**.

3.2 Sammisag 2 – Missingersuutininun sunniuteqanngitsumik allannguutit, aappassaaneerineq
Konto pingaarneq 40.01.08 Ilinniartitaanermut pilersaarut kiisalu ilinniartitaanerup immikkut
ittumik suliniuteqarfigineqarnera

Konto pingaarneq 40.10.12 Efterskolit

Qulequttami tassani allannguutissatut siunnersuummut nr. 47-mut aamma 48-mut isummernissani Aningaasaqarnermut Akileraartarnermullu Ataatsimiititaliap aappassaaneerineri kinguartippaa. Ataatsimiititaliaq isumaliutissiissummini ima allappoq:

” Konto pingaarnermut matumunnga aningaasaliinermi tunngavigineqartut allanngortinneqassasut Naalakkersuisut siunnersuutigaat, taamaalilluni ukioq atuarfiusoq 2013/2014 aallarnerfigalugu aningaasat agguagassat pilersinneqassallutik, taakkunanga Danmarkimi efterskolernermi nammineq akiliutigisartakkat appartinneqarnissaannut angajoqqaat isertitakittut tapiissutit ilanissaannut qinnuteqarsinnaallutik. Taamaattumillu aningaasaliissutit 2013-imi 0,5 mio. kr.-inik aammalu ukiumi missingersuusiorfimmi 2014-imi 1 mio. kr.-inik amerlineqarnissat qinnutigineqarpoq. Aaqqissuussinermili tassani atuartut Danmarkimi efterskolertut kisimik ilaatinneqassasut sooq siunnersuutigineqarnerisooq ersseqqinnerusumik paasisutissiisutigineqassasoq ataatsimiititaliamit kissaatigineqarpoq.

Tamana tunngavigalugu allannguutissatut siunnersuutit akuerineqarnissaa ataatsimiititaliamit imaaliillaannaq inassutigineqarsinnaanngilaq.

*Siuliani apeqqutigineqartoq aappassaaneerinissamut akissuteqaamminni akeqqullugu Naalakkersuisut ataatsimiititaliamit qinnuigineqarput. Tunganut allannguutissatut siunnersuutininun isummernissani ataatsimiititaliap **kinguartippaa.**”*

Aappassaaneerineri akissuteqaamminni suliaq pillugu Naalakkersuisut ima paasisutissiippat:

”Efterskolernermit tapiissutinut atatillugu Naalakkersuisunit paasisutissiisutigineqarsinnaavoq Danmarkimi efterskolernermit atuisut akiliutaat ukiuni kingullerni qaffakkiartuaarmata. Taamaattumik Kalaallit Nunaanni ilaqutariit isertitakinnerusut qitornamik Danmarkimi efterskolertiartinnissaannut aningaasalersuinissartik ajornakusoortittorujussuussavaat. Akerlianik Kalaallit Nunaanni efterskolernermit atuisut akiliutaannut tapiissutit ima inissititerneqarput ilaqutariit isertitakinnerusut atuisutut akiliuteqartinneqartarnatik. Taamaalilluni Kalaallit Nunaanni efterskolit Danmarkimi efterskolinit annertunerusumik atuisunut akiliutinut tapiissutinik amerlanerusunik 2013-imi pissarsissapput. Siunnersuut aqqutigalugu ilaqutariit isertitakinnerusut meeqqamik Danmarkimi efterskolertiartinnissaannut aningaasatigut aamma periarfissaqartinneqassapput.”

(Allannguutissatut siunnersuut nr. 47 aamma 48)

Sammisag 2-p ataani allannguutissatut siunnersuutit nr. 47 aamma 48 **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq.**

3.3 Sammisag 6 – Teknikkikkut allannguutit, pingajussaaneerineq

Qulequttami tassani allannguutissatut siunnersuutinik 14-inik Naalakkersuisut saqqummiussipput. Allannguutissatut siunnersuutit taakku ataatsimut isigalugu IST-mut sunniuteqassanngillat. Pineqartut tassaanerupput missingersuutinut ilanngussat oqaasertaasa ilusiligaanerannik erseqqissaanerit annikinnerusut, suliassami kisitsisinik iluarsiiinerit, kukkunernik iluarsiiinerit il.il. Allannguutissatut siunnersuutit ilaat arlallit aappassaaneerinissamut Aningaasaqarnermut Ataatsimiititaliap isumaliutissiissutaanit imaluunniit apeqqutaanit aallaaveqarput, tak. ilanngussaq A.

Allannguutissatut siunnersuutit matuma kingulianiittut ataatsimiititaliamit immikkut ima oqaaseqarfigiومانeqarput:

Konto pingaarneq 83.30.12 Utoqqaat angerlarsimaffii aamma

Konto pingaarneq 83.30.13 Nuna tamakkerlugu paaqqinniffiit

Allannguutissatut siunnersuutit sisamat konto pingaarnernut taakkununga tunngasut saqqummiunneqarput, nr. 104-mit 107-imut. Konto pingaarnernut taakkununga missingersuutinut ilanngussani tabelit assigiit kukkuneqartut Naalakkersuisunut apeqqutimini, tak. ilanngussaq A, ataatsimiititaliap oqaatiga. Tamanna aappassaaneerinissamut iluarsiissuteqarfiginarlugu Naalakkersuisut neriorsuutigaat. Allannguutissatut siunnersuutinik saqqummiussisoqarsimannginnera aappassaaneerinissamut isumaliutissiissummini ataatsimiititaliap iluarinagu oqaatigaa. Maannalu pingajussaaneerinissamut allannguutissatut siunnersuutinik saqqummiussisoqarpoq, tabelilli suli kukkuneqarput, tamannalu assorsuaq naammaginangilaq. Kukkunerillumiuuku tamaattorpiat pissutigalugit aaqqissuussaanikkut aallannguutit, aningaasanut inatsimmik suliaqarnermi siusissukkut tikkuarneqareersut, aappassaaneerinermi iluarsineqartussaasut.

Allannguutissatut siunnersuutit sisamat saqqummiunneqarput, marluk naammakkaluarput; konto pingaarnerit marluusut tamarmik ataaseq. Kukkunilinnut taarsiullugit konto pingaarnerit marluusut ataanni tabelinik assigiinnik nutaanik ilanngussinissaq Naalakkersuisunit kissaatigineqarpoq. Tabelit ataanni nalunaarsukkami allassimavoq Sanaartornermut Iluarsagassanullu Aningaasaateqarfiup (SIA) ataanni kisitsisit aningaasaliissutaasut tamarmisut pilersaarummut qilersorsimasut. Tassanili 2012 sioqqullugu SIA-mut kisitsisit kisimik allassimapput pilersaarummullu tamarmiusumut aningaasaliissutit ”katillugit” ataanni allassimallutik. Kiisalu tabelit ataanni nalunaarsukkani allassimavoq allannera silittumik allanneqarsimappat aningaasaliissutit pilersaarummut tunniunneqareersimassasut, taamalu SIA-mut ikineqarsimassallutik. Ukiunut missingersuusiorfiusunut 2014-2016-imut aningaasaliissutit arlallit SIA-mut ikineqareersimasutut tabelini allassimapput. Tamanna eqqunngilaq, aningaasammi SIA-mut aatsaat ikineqassapput aningaasanut inatsiseqarfimmi attuumasuni, tassa 2013 ilanngullugu aningaasaliissutit SIA-mut ikineqarsinnaallutik. Tabelit eqqortumik suli takutitsinnginnerat assut isornartoqartutut ataatsimiititaliamit isigineqarpoq apeqqutaalerporlu nalunaarsukkat peerneqavippata atoruminarnerussannginnerasoq, taamaaliornikkut tabelit atuaruminarnerulissammata aammalu kisitsisit allassimasut qulequtaasut ataanni allassimassallutik. 2013-imi aningaasanut inatsimmi eqqortumik takutitseqqullugit tabelit iluarsineqarnissaat Naalakkersuisunit qulakkeerneqassasoq ataatsimiititaliamit **kaammattuutigineqarpoq**. (Allannguutissatut siunnersuutit nr. 104-mit 107-imut)

Konto pingarneq 87.11.09 Assartuussineq pillugu Isumalioqatigiissitaq - misissueqqaarnerit

Suliaq nr. 996.23.004-ip, Assartuussineq pillugu Isumalioqatigiissitat – misissueqqaarnerit, ataani oqasertanik allanik ilanngussisoqassasoq Naalakkersuisut siunnersuutigaat. Suliassat allaaserinerat erseqqinngitsoq ataatsimiititaliaq isumaqarpoq aammalu ilaatigut manna tikillugu misissueqqaarnerit suut ingerlanneqarsimanersut, misissueqqaarnerit suut siunissami ingerlanneqalersaarnersut aammalu Narsarsuarmi mittarfik matullugu Qaqortumi nutaamik mittarfiliortoqarpat inuiaqatigiit aningaasaqarnerannut qanoq sunniuteqarsinnaanersoq erseqqissaqqullugit apersuinissamut Ineqarnermut, Attaveqarnermut Angallannernullu Naalakkersuisup aggersarneqarnissaa pisariaqartissimallugu, tak. ilanngussaq AA. Tamatumunnga minnerunngitsumik pissutaavoq tusagassiorfiit malillugit isumaqarnarmat Qaqortumi mittarfiliornissaq pillugu Naalakkersuisut annertungaatsiartunik misissuisimasut aalajangiisimasullu. Kiisalu Naalakkersuisoq nunatta kujataaniissimavoq, tamatumani ataatsimiititaliaq isumaqarluni mittarfiup nuunneqarsinnaanera pillugu aalajangiisoqartoq, taamaattorli tamanna pillugu Inatsisartunut ilisimatitsissuteqartoqarani.

Naalakkersuisut sumut ingerlalersaarnersut apersuinermit erseqqissitinneqangaanngilaq aammalu sulii erseqqinngilaq paasissutissanik sunik tunngaveqarlutik Inatsisartut 2013-imi upernaakkut ataatsimiinnermi aalajangiinissaat naatsorsuutigineqarnersoq. Teknikimut tunngasumik misissuinerit arlallit ingerlanneqarsimasut isumaqartoqartorlu Qaqortup eqqaani inissiivissaq 2 tikinneqarsinnaassuseq eqqarsaatigalugit pitsaanerpaasoq Naalakkersuisup apersuinermit paasissutissiissutigaa. Mittarfiup nuunneqarneratigut najukkami inuussutissarsiornerikkut inuiaqatigiillu aningaasaqarnerannut sunniutissat Naalakkersuisup paasissutissiissutigisinnaanngilai, naak qaammatit marluk missaasa iluanni Naalakkersuisut tunngaviusumik aalajangiissasut Naalakkersuisumik naatsorsuutigineqartoq. Piffissap taassuma iluani Naalakkersuisoq akiitsut aamma aningaasaliinerit pillugit periusissami piumasaqaatit eqquutsinneqarsimanersut pillugit misissueqqaarnermik ingerlatseriisaaq aammalu suliassamut pilersaarummik, aalajangiinnermi tunngavigineqarsinnaasumik, suliaqareerluni.

Sanaartugassat nunamut tamarmut assorsuaq pingaarutillit pillugit sulinerup siuariartorfiunera pillugu Inatsisartunik aammalu ataatsimiititalianik susassaqtunik Naalakkersuisut ilisimatitsisannginnerat assut isornartutut Aningaasaqarnermut Ataatsimiititaliamit isigineqarpoq. Paasissutissanik aalajangiinissami tunngavissanik naammattunik Inatsisartut peqanngippata, tamanna inuiaqatigiit aningaasaqarnerannut imaannaanngitsumik kinguneqarsinnaavoq. Sanaartugassat annertuut pingaarutillillu, soorlu nutaanik mittarfiliorerit umiarsualiviliorerillu, siumukarfiunerat killiffiallu pillugit Inatsisartut ataatsimiititaliaanik susassaqtunik, taakkununga ilanngullugu Sanaartornermut Avatangiisinullu Ataatsimiititaliamik, Inuussutissarsiornermik Ataatsimiititaliamit, ingerlaavartumik ilisimatitsisarnissaq oqaloqatiginnittarnissarlu qulakkeeqqullugu Naalakkersuisut ataatsimiititaliamit **kaammattorneqarput**.

(Allannguutissatut siunnersuut nr. 108)

Sammissaq 6-ip ataani allannguutissatut siunnersuutit nr. 95-imit 108-imut **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

3.4 Sammissaq 7 – Missingersuutitut sunniuteqanngitsumik allannguutit, pingajussaaneerineq

Qulequttami tassani allannguutissatut siunnersuutitut 18-inik Naalakkersuisut saqqummiussipput. Allannguutissatut siunnersuutitut taakku ataatsimut isigalugu ukiumi aningaasanut inatsisip atuuffiani ukiunilu missingersuusiorfinni missingersuutitut sunniuteqassanngillat.

Allannguutissatut siunnersuutit matuma kingulianiittut ataatsimiititaliamit immikkut ima oqaaseqarfigiumaneqarput:

Konto pingaarneq 10.06.26 Inuit Pisinnaatitaaffiit Kalaallit Nunaata Siunnersuisoqatigiivi

Inuit Pisinnaatitaaffiit Kalaallit Nunaata Siunnersuisoqatigiivinit 2013-imi aammalu ukiuni missingersuusiortinni 2014 – 2016-mi tamani 0,9 mio. kr.-inik aningaasaliissuteqartoqarpoq. Naalackersuisoqarfiit tamarmik ingerlatsinermut kontoinit 100.000 kr.-inik nuussinikkut aningaasaliissutit aningaasalersorneqarput, tak. allannguutissatut siunnersuutit nr. 109, 111, 115, 119, 120, 123, 124, 125, 126. 2017 aallarnerfigalugu siunnersuisoqatigiit ukiut allortarlugit Inatsisartunut nalunaaruteqartassapput.

(Allannguutissatut siunnersuut nr. 110)

Sammisaq 7-ip ataani allannguutissatut siunnersuutit nr. 109-imit 126-mut **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

3.5 Sammisag 8 – Isertitaqarnerunissamik inatsisitigullu aningaasartuutinit pisussaaffigisanit naatsorsuutit, pingajussaaneerineq

Qulequttami tassani allannguutissatut siunnersuutit 4-nik Naalackersuisut saqqummiussipput. Allannguutissatut siunnersuutit taakku IST-p inerneranut 2013-imi 40 mio. kr.-inik ukiunilu missingersuusiortinni tamani 15 mio. kr.-inik ataatsimut pitsanngoriaataassapput.

Allannguutissatut siunnersuutit matuma kingulianiittut ataatsimiititaliamit immikkut ima oqaaseqarfigiumaneqarput:

Konto pingaarneq 24.10.10 Nuna tamakkerlugu akileraarut

Konto pingaarnermi matumani isertitassatut missingikkat ukiumi aningaasanut inatsisip atuuffiani taamatullu ukiuni missingersuusiortinni tamani 20 mio. kr.-inik amerlineqarnissaat Naalackersuisut kissaatigaat. Piviusorsioortumik missingersuusiornissap pisariaqartinneqarnera ataatsimiititaliamit paasineqarsinnaalluarpoq, taamaattorli allannguutissatut siunnersuutit matumani pineqartup akileraarutitigut iluanaarutissanut suliassamilu kisitsisinut tunngatillugu allannguutissatut siunnersuummut nr. 143-mut aamma 156-imut ataqatigiinnera pingajussaaneerinissamut akissuteqaamminni nassuiaatigeqqullugu Naalackersuisut **qinnuigineqarput**.

(Allannguutissatut siunnersuut nr. 128)

Konto pingaarneq 24.11.12 Raajanut akitsuutit

Raajanut akitsuutit 10 mio. kr.-inik amerlanerusunik isertitaqarnissaq Naalackersuisut naatsorsuutigigaat allannguutissatut siunnersuummi allassimavoq. Konto pingaarnermut 24.11.12-imut missingersuutit ilanngussami ima allassimammat Aningaasaqarnermut Ataatsimiititaliamit eqqumaffigeqquneqassaaq:

”Akitsuut procentitigut allanngorartuuvoq qaammatit pingasukkaarlugit naleqqersuut tunngavigalugu aalajangersarneqartarluni raajat akitsuusigassat tunineqarnerminni agguaqatigiissillugu akiat aallaavigalugu”.

Tamanna tunngavigalugu tunisnermi agguaqatigiissillugu akit ineriartornerat pillugu siunissami Aalisarnermut Ataatsimiititaliaq ilisimatitsissuteqarfigisaqqullugu Naalakkersuisut ataatsimiititaliamit qinnuigineqarput.
(Allannguutissatut siunnersuut nr. 130)

Sammissaq 8-ip ataani allannguutissatut siunnersuutit nr. 127-imit 130-mut **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

3.6 Sammissaq 9 – Ujaasinissamut annaassiniarnissamullu upalungaarsimaneq

Qulequttami tassani allannguutissatut siunnersuutit 2-nik Naalakkersuisut saqqummiussippat. Allannguutissatut siunnersuutit taakku IST-p inerneranut 2013-imi ukiunilu missingersuusiorfinni tamani 5,5 mio. kr.-inik ataatsimut pitsanngoriaataassapput.

Allannguutissatut siunnersuutit matuma kingulianiittut ataatsimiititaliamit immikkut ima oqaaseqarfigiumaneqarput:

Konto pingaarneq 20.05.09 Naalagaaffiup ataatsimoortumik tapiissutai

Kalaallit Nunaata qeqqani aammalu Diskop eqqaani ujaasinissamut annaassiniarnissamullu upalungaarsimanermik (SAR) Namminersorlutik Oqartussat isumaginninnissaannik isumaqatigiissummik Namminersorlutik Oqartussat atorunnaarsitsinerata kinguneranik aningaasaliissutit ikilineqarnissaat qinnutigineqarpoq. Piffinni siuliani taaneqartuni SAR 2013-imi naalagaaffimmit isumagineqalissaq. SAR nunat tamalaat akornanni isumaqatigiissut malillugu naalagaaffiup suliassaraa, naalagaaffimulli ataatsimoortumik tapiissutit aqutugalugit tassunga aningaasatigut tapiissuteqartartumut isumaqatigiissuteqarluni SAR-imik suliassaq 2001-imiilli Namminersorlutik Oqartussanit isumagineqarpoq.

Ataatsimoortumik tapiissutit ikilineqarnerat inatsisinut naapertuunnersoq apeqqusissallugu ataatsimiititaliap pisariaqartippaa, taakkumi Namminersornermut inatsimmi § 5, imm. 1 aamma 2 naapertorlugu allanngortinneqarsinnaanatik inissitaapput. SAR Namminersorneq pillugu inatsimmi imaluunniit Namminersorneq pillugu Isumalioqatigiissitap isumaliutissiissutaani taaneqanngilaq, taamaattumillu ima paasineqarsinnaavoq; SAR pillugu isumaqatigiissummit, 2001-imi isumaqatigissutigineqaaqaartumit, 9 mio. kr.-it Danmarkimit ataatsimoortumik tapiissutinut, oqaatigineqareersutut allanngortinneqarsinnaanngitsunut ilaasut. Danskit aningaasanut inatsisaanni oqaasertaliussat aqutugalugit Namminersorneq pillugu inatsimmik allannguisoqarnera ataatsimiititaliamit tupigusuutigineqarpoq. Namminersorneq pillugu inatsit sioqqullugu sulinermit tamanna naapertuussorinangilaq. Naluneqanngitsutut Kalaallit Nunaanni namminersornerup eqqunneqarnissaa pillugu siunnerfiliisumik innuttaasunik taasisitsisoqareersoq Namminersorneq pillugu inatsit Folketingimi akuerineqarpoq.

Tamanna tunngavigalugu tamatuma ataqatigiinnera pingajussaaneerinissamut akissuteqqaammi sukumiisumik nassuiaatigeqqullugu Naalakkersuisut Aningaasaqarnermut Ataatsimiititaliamit **qinnuigineqarput**. Allannguutissatut siunnersuutip matumani pineqartup saqqummiunneqarnissaa sioqqullugu Naalakkersuisut Siulittaasuata suliassaqarfia danskillu statsministereqarfia sulinermit qanoq akuutinneqarsimanersut immikkut itisilerneqassasoq ataatsimiititaliap kissaatigaa, tassungalu ilanngullugu SAR pillugu isumaqatigiissutip atorunnaarsinneqarnerata kinguneranik ataatsimoortumik tapiissutit ikilineqarnerisa inatsisinut naapertuunnersa pillugu statsministereqarfik qanoq nassuiaateqarsimanersoq. Kiisalu isumaqatigiissutinik allanik atorunnaarsinneqarnerat

ataatsimoortumik tapiissutunik naalagaaffiup ikililerineranik kinguneqarsinnaasunik Naalakkersuisut ilisimasaqarnersut paasissutissiissutigineqassasoq ataatsimiititaliamit kissaatigineqarpoq.

Aningaasanut inatsimmi aningaasaliissutit piviusorsioortumik missingersuusiorneqartarnissaat Aningaasaqarnermut Ataatsimiititaliamit pingaartinneqarpoq, tamannalu tunngavigalugu siunnersuummik Naalakkersuisut saqqummiussinerat akuerineqarnissaanillu inassuteqarnerat Aningaasaqarnermut Ataatsimiititaliamit paasineqarsinnaavoq, tassami ataatsimoortumik tapiissutit aningaasanik taaneqartunik ikilineqarnissaat pillugu Aningaasaqarnermut Naalakkersuisoqarfiup nalunaarummik tigusaqarsimanera ataatsimiititaliamit ilisimaneqarmat. Taamaattumillu Namminersorneq pillugu inatsimmik taamatut saneqqutsisimasinnaaneq ataatsimiititaliamit angerneqarneratut ataatsimiititaliap akuersissutiginninnera isigineqassanngilaq.
(Allannguutissatut siunnersuut nr. 131)

Sammisaq 9-ip ataani allannguutissatut siunnersuutit nr. 131 aamma 132 **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

3.7 Sammisag 10 – Aningaasartuuteqarnerunissamik kissaatit, pingajussaaneerineq

Qulequttami tassani allannguutissatut siunnersuutit 4-nik Naalakkersuisut saqqummiussippat. Allannguutissatut siunnersuutit taakku IST-p inerneranut ataatsimut 25 mio. kr.-ingajannik ajoreriaataassapput. Allannguutissatut siunnersuutit nr. 133-ip allannguutissatut siunnersuut nr. 68 taasermagu oqaatigineqassaaq, tak. ilanngussaq P. Kiisalu malugeqquneqarpoq allannguutissatut siunnersuummut nr. 136-imut iluarsiiusummik Naalakkersuisut nassiusimmata, tak. ilanngussaq AA.

Allannguutissatut siunnersuutit matuma kingulianiittut ataatsimiititaliamit immikkut ima oqaaseqarfigiutaneqarput:

Konto pingaarneq 20.30.09 Sulisunik utaqqiisaasumik najugaqartitsisarneq

Allannguutissatut siunnersuut nr. 68 Naalakkersuisunit tunuartinneqartoq allannguutissatut siunnersuutit matuma taarserpaa. Naalakkersuisut anfører i ændringsforslaget:

”Naalakkersuisut aningaasaliissutit qaffanneqarnissaannik qinnuteqassallutik pisariaqartutut isigaat, sulisut taamaalillutik sulisunut inissiamik utaqqisut utaqqiisaasumik inissiamiiginnartassammata sulisunut inissiamik tunineqarnissamik tungaannut. Taamaattorli erseqqissarneqassaaq siunissami utaqqiisaasumik inissiat ikilisarneqarnissaannik Naalakkersuisuat sulissuteqarmata.”

(Allannguutissatut siunnersuut nr. 133)

Konto pingaarneq 77.03.01 Partiit qineqqusaarnissaannut tapiissutit

Aningaasaqarnermut Ataatsimiititaliami amerlanerussuteqartut Inuit Ataqatigiineersut, Siumumeersut aamma Atassummeersut qinnuiginninnerisigut aningaasaliissutit 2013-imi 3,3 mio. kr.-inik amerlineqarnissaat allannguutissatut siunnersuutikkut matumuuna qinnutigineqarpoq. Missingersuutit ilanngussami allassimavoq qinnuteqarnikkut aningaasat partiinut ataasiakkaanut qanoq agguataarneqassanersut.

(Allannguutissatut siunnersuut nr. 135)

Konto pingaarneq 84.40.10 Kommunini atuarfiit

Allannguutissatut siunnersuummut matumunnga iluarsiiisummik Naalakkersuisut nassiussipput, tak. ilanngussaq AA. Immikkoortumut pilersaarutip nutarterneqarnissaa aammalu missingersuutitut ilanngussami oqaasertat uku ilanngunneqarnissaat qinnutigineqarpoq:

"AIS 2013-ip pingajussaaneerineqarnerani sanaartornermut aningaasaliissutit ima amerlineqarput, 2013-imi 14,5 mio. kr., 2014-imi 12,7 mio. kr. aammalu 2015-imi 37,4 mio. kr. Amerlissutit Narsami Alluitsup Paa-nilu atuarfiit sanaartorneqartussat 2014-imiit 2013-imut siuartinneqarnissaannut atorineqassapput. Kiisalu Ilulissani Mathias Storch-ip aturfianut illikartinneqarput 2015-imi 25 mio. kr.-it aammalu 2016-imi 50 mio. kr.-it."

Tabelip ataani oqaasertani ilusiliinikkut kukkuneqartoq ataatsimiititaliamit maluginiarneqarpoq. Tassani allassimavoq allannera silittumik allanneqarsimappat aningaasaliissutit pilersaarummut tunniunneqareersimassasut, taamalu Sanaartugassanut Iluarsagassanullu Aningaasaateqarfimmut ikineqarsimassallutik (SIA). Tamannali kukkusuusimassaaq, tak. ataatsimiititaliap immikkoortoq 3.3-p ataani oqaaseqaatai, tassa ukiuni missingersuusiorfinni aningaasaliussat ukiut aningaasanut inatsisip atuuffigisai pineqartut anguneqartinnagit SIA-mut ikineqarsinnaanngimmata. Kiisalu *** ataanni oqaasertani tabelimi ” Agguaanneqanngitsut”-nut innersuussinerusooq ataatsimiititaliamit ilimagineqarpoq, tamannali erseqqinngissorinarpoq. Ilusiliinikkut kukkunerit taakku 2013-imi aningaasanut inatsisip katersorneqarnerani aaqqinneqassasut ataatsimiititaliamit **kaammattuutigineqarpoq.**

(Allannguutissatut siunnersuut nr. 136)

Sammissaq 10-p ataani allannguutissatut siunnersuutit nr. 133-mit 134-mut aammal 136 **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq.**

Sammissaq 10-p ataani allannguutissatut siunnersuut nr. 135 **akuerineqassasooq** Aningaasaqarnermut Akileraartarnermullu Ataatsimiititaliami amerlanerussuteqartunit Inuit Ataqtigiinnit, Siunit aamma Atassummit **inassutigineqarpoq.**

Sammissaq 10-p ataani allannguutissatut siunnersuut nr. 135 **itigartinneqassasooq** Aningaasaqarnermut Akileraartarnermullu Ataatsimiititaliami ikinnerussuteqartunit Demokraatinit **inassutigineqarpoq.**

3.8 Sammissaq 11 – Sanaartornermi nussuineq, pingajussaaneerineq

Qulequttami tassani allannguutissatut siunnersuutit 4-nik Naalakkersuisut saqqummiussipput. Allannguutissatut siunnersuutit taakku IST-p inerneranut 2013-imi ukiunilu missingersuusiorfinni 2014-imi 2015-imilu tamani 4,5 mio. kr.-inik ajoreriaataassapput kiisalu IST-p inerneranut ukiumi missingersuusiorfimmi 2016-imi 13,5 mio. kr.-inik pitsanngoriaataassapput.

Allannguutissatut siunnersuutit matuma kingulianiittut ataatsimiititaliamit immikkut ima oqaaseqarfigiumaneqarput:

Konto pingarneq 80.00.80 Aningaasat suliniutinik aallartitsinissamut sillimmatit

Aalajangiinissamut tunngavissaqalernissaq siunertaralugu sanaartugassatut iluarsagassatullu suliaasat naalakkersuinikkut pingartinneqartut aallarniutaasumik pilersaarusiornissaannut aningaasaliissutinik atugassiinissamut atorneqartussanik kontomi pingaarnermi matumani suliniutinik aallartitsinissamut 6,8 mio. kr.-inik aningaasaliissuteqarnissaq Naalakkersuisut qinnutigaat.

(Allannguutissatut siunnersuut nr. 138)

Sammissaq 11-p ataani allannguutissatut siunnersuutit nr. 137-imit 140-mut **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

3.9 Sammissaq 12 – Akileraartarnermik allangortiterineq aamma aaqqissuuseqqinnermut atugassatut aningaasaliissutit

Qulequttami tassani allannguutissatut siunnersuutinik 9-nik Naalakkersuisut saqqummiussipput. Allannguutissatut siunnersuutit taakku IST-p inerneranut 2013-imi 16,4 mio. kr.-inik ajoreriaataassapput.

Allannguutissatut siunnersuutit matuma kingulianiittut ataatsimiititaliamit immikkut ima oqaaseqarfigiumaneqarput:

Konto pingarneq 20.11.52 Suliffissaaleqisut aammalu 15-it 18-illu akornanni ukiullit ilinnialersimannigitsut immikkut ittumik iliuuseqarfigineqarnissaannut inuiaqatigiit aaqqissugaanerannut aningaasaliissutit

Konto pingarneq nutaajuvoq aammalu suliffissaaleqisut aammalu 15-it 18-illu akornanni ukiullit ilinnialersimannigitsut immikkut ittumik iliuuseqarfigineqarnissaannut 2013-imi 36,5 mio. kr.-it immikkoortitsisoqassaaq. Ukiumi missingersuusiorfimmi 2014-imi 39,2 mio. kr.-it, ukiumi missingersuusiorfimmi 2015-imi 34,5 mio. kr.-it aammalu ukiumi missingersuusiorfimmi 2016-imi 30,5 mio. kr.-it immikkoortinneqarput.

Naalakkersuisut Aningaasaqarnermut Ataatsimiititaliaq tusaaniarlugu aaqqissuussaannikkut ajornartorsiutit, Aningaasaqarnermut Siunnersuisoqatigiit nalunaarusiaani ilaatigut nassuiaatigineqartut, iliuuseqarfigineqarnissaannut aningaasat ataatsimoortissimammattigit ataatsimiititaliamit assut iluarisimaarneqarpoq. Konto pingaarnermi matumani aningaasaliissutit suliffissaaleqisunut immikkut ittumik iliuutsit ingerlateqqinneqarnissannut atorneqassapput, tassunga immikkut ilanngullugu suliniutit 15-init 18-nut ukiullit suliffeqarnermut ilaalernissaannut ikiorsiissutaasussat. Missingersuutinut ilanngussami ima allassimavoq:

”Suliniutit suliffissaaleqisunut immikkut ittumik suliniutaasunut ingerlatitseqqissapput aammalu ilinniartitaanerup suliffeqarnerullu tungaasigut suliniutaasimasut pisariaqarfiisigut tapersersussallugit. Tamatumani pineqarpoq 15-iniit 18-inut ukiullit akornanni nuna tamakkerlugu ilitsersuinikkut suliniutip pilersinneqarnissaannut qulakkeerinninnissap pisariaqartinneqarnera, ingerlariaqqinnissamut atuagassorfiunngitsunik ilinniarnernik allanik pilersitsinissaq inuusuttut amerlanerit ilinniarnissamut sulilernissamullu piareersimatinniarlugit, inuusuttut amerlanerusut højskolinut efterskolinullu

isersinnaaleqqullugit, pingaartumik nunaqarfinneersut asimioqarfinneersullu. Sillimmatit aamma atorneqarsinnaassapput sullitanut taaneqartunut ilinniarnissamut sulilernissamullu suliniutinut ajornartorsiorfiusunut ikiuutaasussat, tassunga ilaalluni suliffimmi sungiusarnissami amigaateqartarnerup annikillissarnissaa ilinniartullu ineqarfiinik inissaqartitsinerup pisarialimmi ksulissutigineqarnissaa Tamakku saniatigut sillimmati tsuliffissat amerlanerusut pilersinnissaannut suliniutinut aamm aatorneqarsinnaasariaqarput.

Suliniutit sapinngisaq malillugu naleqqussarneqarnissaat ingerlanneqarnissaallu anguniarneqarpoq kommunit suliffeqarfinnilu peqataasut suleqatigalugit.”

15-init 18-inut ukiullit ilinniagaqarnissamu tsuliffeqalernissamullu piareernerunissaannut aamma ikiorserneqarnerat ataatsimiititaliamit pitsaasutut isigineqarpoq, tassungalu ilanngullugu amerlanerit, matumanilu minnerunngitsumik inuusuttut nunaqarfinneersut isorliunerusuneersullu, højskolernissamut efterskolernissamullu aqutissiuunneqarnerat. Kiisalu aningaasat kommuninik aammalu suliffeqarnermi illuatungeriinnik suleqateqarluni atorneqarnissaasa qulakkeerneqarnissaa pingaaruteqarpoq.

Suliffissaaleqisut siuliani pineqartunut ilaanngitsut ullumikkullu suliffeqanngitsut puigorneqannginnissaat ataatsimiititaliamit pingaartinneqarpoq. Suliffissaaleqisut taakku suliffeqaleqqinnissamut ikiorniarlugit iliuusissat pingajussaaneerinissamut akissuteqaamminni nassuiaatigeqqullugit Naalakkersuisut ataatsimiititaliamit **qinnuigineqarput**.

Illoqarfinnut isorliunerusunullu oqaaseq kalaallisut atorneqartoq ”asimioqarfinneersullu” naleqqutinngitsutut isigigamiuk ataatsimiititalimit oqaatigineqassaasoq.

Ataatsimiititaliaq isumaqarpoq konto pingaarneq matumani pineqartoq suliassaqarfimmut pingaartinneqartumut ilinniartut inaannik sanaartornermut atorneqassanngitsoq, taakkunungali aningaasaliineq konto pingaarneq 84.40.15, ilinniartut inaannik sanaartornermut tunngasoq, aqutigalugu eqqortumik pisariaqarpoq. Taamaattumik konto pingaarnermut matumunnga allannguutissatut siunnersuummik (nr. 163), tassani oqaasertat ilinniartut inaannik pisariaqartinneqartunik pilersitsinissamut periarfissiisut peerneqarput, tak. immikkoortoq 3.12 aamma ilanngussa q.

(Allannguutissatut siunnersuut nr. 142)

Konto pingaarneq 24.10.10 Nuna tamakkerlugu akileraarut

Konto pingaarneq 24.10.12 Ingerlatseqatigiiffiit akileraarutat, Namminersorlutik Oqartussat suliffeqarfiutaat

Konto pingaarneq 24.11.11 Qamutininut motorilinnut akitsuutit

Konto pingaarneq 24.11.25 Avataanit aalisarnermit qalerallinnut akitsuutit

Ataatsimiititaliami ikinnerussuteqartut Siumut Atassullu siunnersuutit pillugit oqarumapput; akileraarutit akitsuutillu pillugit siunnersuutit ataasiakkaarlugit saqqummiunneqarsimagaluarpata aammalu nunatsinni aqqissuussaannikkut ajornartorsiutit aqqinneqarnissaannut atugassatut Nunatta Karsiata isertitaasa amerlineqarnissaat siunnersuutikkut siunertaasimagaluarpat siunnersuutit arlallit tapersorsorneqarsinnaasimagaluartut, taakkunungalu ilanngullugu avataanit aalisarnermit qalerallit

akitsuutaat. Akileraarutit akitsuutillu pillugit siunnersuutit siunertaat pingaarneq tassaammat nuna tamakkerlugu akileraarummik 1 procentimik appaanissaq aningaasanut inatsisissatut siunnersuummut allannguutissatut siunnersuutit siuliani taaneqartut Siumumit aamma Atassummit taparserneqarsinnaanngillat. Akileraarummik appaaneq akissarsiakinnerpaanut annikinnerpaamik iluaqutaassaaq, naak taakku tassaagaluartut aningaasatigut ikiorserneqarnissamik pisariaqartitsinerpaat.
(Allannguutissatut siunnersuutit nr. 143-mit 146-mut)

Sammissaq 12-p ataani allannguutissatut siunnersuutit nr. 141-imit 142-mut **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

Sammissaq 12-p ataani allannguutissatut siunnersuutit nr. 143-mit 146-mut **akuerineqassasut** Aningaasaqarnermut Akileraartarnermullu Ataatsimiititaliami amerlanerussuteqartunit Inuit Ataqatigiinnit aamma Demokraatinit **inassutigineqarpoq**.

Sammissaq 12-p ataani allannguutissatut siunnersuutit nr. 143-mit 146-mut **itigartinneqassasut** Aningaasaqarnermut Akileraartarnermullu Ataatsimiititaliami ikinnerussuteqartunit Siumumit aamma Atassummit **inassutigineqarpoq**.

Sammissaq 12-p ataani allannguutissatut siunnersuutit nr. 147-imit 149-mut **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

3.10 Sammissaq 13 – Ilinniartitaanermi nussuineq

Qulequttami tassani allannguutissatut siunnersuutit 5-nik Naalakkersuisut saqqummiussipput. Allannguutissatut siunnersuutit taakku IST-p inerneranut 2013-imi ukiumilu missingersuusiorfimmi 2014-imi 1,8 mio. kr.-inik ajoreriaataassapput kiisalu IST-p inerneranut ukiuni missingersuusiorfinni 2015-imi aamma 2016-imi tamani 1,8 mio. kr.-inik pitsanngoriaataassapput.

Allannguutissatut siunnersuutit matuma kingulianiittut ataatsimiititaliamit immikkut ima oqaaseqarfigiumaneqarput:

Konto pingaarneq 40.91.27 Sanaartornermik Saviminilerinerimik Aatsitassaleri

Missingersuutit ilanngussami oqaasertanik nutaanik ilanngussinissaq ilaatigut qinnutigineqarpoq, tassani erseqqissaatigineqarluni qatserisartunngornianut ilinniartuup ingerlanneqarneranut immikkuullarissumik tapiissuteqarnissaq erseqqissaatigineqarluni. Tassunga atatillugu naammassinninnissamut procenterititassat ilinniartitsinermilu pitsaassusissat pillugit piumasaqaatit atuuttut qatserisartunngornianut ilinniartimmit equutsinneqarnersut pingajussaaneerinissamut akissuteqaamminni nassuiaatigeqqullugu Naalakkersuisut ataatsimiititaliamit **qinnuigineqarput**.
(Allannguutissatut siunnersuut nr. 153)

Sammissaq 13-ip ataani allannguutissatut siunnersuutit nr. 150-imit 154-mut **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

3. 11 Sammisag 14 – Suleriaaseq pillugu Ataatsimiititaliamit allannguutissatut siunnersuut

Suleriaaseq pillugu Ataatsimiititaliaq allannguutissatut siunnersuummik ataatsimik saqqummiussaqarpoq. Allannguutissatut siunnersuut IST-p inerneranut taamaallaat 2013-imi 650.000 kr.-inik pitsanngoriaataassaaq.

Konto pingarneq 01.11.01 Inatsisartut Ombudsmandiat

Konto pingarneri aningaasaliissutit taamaallaat 2013-imi 650.000 kr.-inik ikilineqarnissaat Suleriaaseq pillugu Ataatsimiititaliamit siunnersuutigineqarpoq, tassa aningaasarsianut aningaasat naatsorsuutigineqarqartut amerlatigisut pisariaqartinneqanngimmata.

(Allannguutissatut siunnersuut nr. 161)

Sammisag 14-ip ataani allannguutissatut siunnersuut nr. 161 **akuerineqassasoq** Suleriaaseq pillugu Ataatsimiititaliamit **inassutigineqarpoq**.

3. 12 Sammisag 15 – Aningaasaqarnermut Ataatsimiititaliamit allannguutissatut siunnersuutit

Aningaasaqarnermut Ataatsimiititaliaq allannguutissatut siunnersuutinik marlunnik saqqummiussivoq. Allannguutissatut siunnersuutit taakku IST-mut sunniuteqanngillat.

Konto pingarneq 87.00.88 Nunaqarfinni isorliunerusunilu sanaartornermut periusissaq

Missingersuutinut ilanngussami oqaasertat naalineqarlutillu allanngortinneqarnissaat Aningaasaqarnermut Ataatsimiititaliamit siunnersuutigineqarpoq, taamaaliornikkut erseqqinnerulersillugu aningaasaliissutit illoqarfiit sisamat annerit Nuup, Sisimut, Ilulissat aamma Qaqortup avataanni nunaqarfinni isorliunerusunilu sanaartornermut iluarsaanernullu taamaallaat atorneqarsinnaasut.

(Allannguutissatut siunnersuut nr. 162)

Konto pingarneq 20.11.52 Suliffissaaleqisut aammalu 15-it 18-illu akornanni ukiullit ilinnialersimangitsut immikkut ittumik iliuuseqarfineqarnissaannut inuiaqatigiit aqqissugaaneranut aningaasaliissutit

Ilinniartut inaannik sanaartornermut aningaasaliissutit atorneqarsinnaanerannik oqaasertatigut innersuussineq missingersuutinut ilanngussamit peerneqassasoq Aningaasaqarnermut Ataatsimiititaliamit siunnersuutigineqarpoq. Ilinniartut inaannik sanaartorneq konto pingarneq 84.40.15, ilinniartut inaannik sanaartornermut tunngasoq, toqqaannartumik aqutigalugu pisariaqartoq ataatsimiititaliaq isumaqarpoq.

(Allannguutissatut siunnersuut nr. 163)

Sammisag 15-ip ataani allannguutissatut siunnersuut nr. 162-imit 163-imut **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

4. Oqaasertaliussanut allannguutissatut siunnersuutit

4.1 Naalakkersuisut oqaasertaliussanut allannguutissatut siunnersuutaat

Oqaasertaliussat nutaat katillugit 6-it Naalakkersuisut siunnersuutigaat. Allannguutissatut siunnersuutit taakku 155-imit 160-imut normoqarput.

Allannguutissatut siunnersuutit taakku ilassutitut isumaliutissiissummi ilanngussaq Q-tut ilanngunneqarput.

Allannguutissatut siunnersuutitut taakkununga ataatsimiititaliaq ilassutitut ima oqaaseqarumavoq:

Konto pingaarneq 10.13.11 Aktiaateqarluni ingerlatseqatigiiffinnut toqqaannartumik aningaasartuutit

Konto pingaarneq 87.73.10 Umiarsualiviit

Nuummi containerersuutitut nutaamik umiarsualiviliornissaq ataatsimiititaliamit tunngaviusumik taperserseqarsinnaavoq. Inatsisunik ilusiliisarnerup tungaanit isigalugu oqaasertaliussami piginnaatitsissut erseqqippiangilaq. Oqaasertaliussaq inatsisunut tunngasumik piginnaaneqartunit misissorneqarsimagaluarpat tamanna malugineqarsimassagaluarpoq. Taamaattumillu tamanna pillugu Aningaasaqarnermut Ataatsimiititaliaq arlalinnik apeqquteqartariaqarsimavoq, tak. Ineqarnermut, Attaveqarnermut Angallannermullu Naalakkersuisumik apersuineq isumaliutissiissummi siusisinnerusumi oqaatigineqartoq.

Nuummi umiarsualiviup aktiaateqarluni ingerlatseqatigiiffingortinneqarnissaani piginnittuunissaq pillugu kissaatit allanngorsimasorinartut pillugit apeqquteqarnissaq ataatsimiititaliamit pisariaqartinneqarsimavoq. Namminersorlutik Oqartussat Sermersuup Kommunanik aningaasaliisartumillu namminersortumik piginneqateqarnissaat 2013-imi aningaasanut inatsisissatut siunnersuutip aappassaaneerseqarnerani oqaasertaliussami akuerineqartumi ersarissumik allaqqasoq, allannguutissatut siunnersuutikkut matumuunakkut paasinarsisorinarpoq Namminersorlutik Oqartussat kisimiillutik piginnittuunissamik kissaateqartut, tamatumanilu ilaatigut umiarsualiviup piusup nalilinnngorlugi aningaasaliissutiginerata saniatigut aktiaateqarluni ingerlatseqatigiiffimmu 80 mio. kr.-inik aningaasaliissuteqarnissaq pisariaqassaaq. Oqaasertaliussamut nassuiaatit naapertorlugit Nukissiorfinni sanaartornermut taarsigassarsiaritit 50 mio. kr.-inik ikilinerisigut kiisalu Royal Arctic Line A/S-ip sinneruttunik 30 mio. kr.-inik, pisariaqassappat ingerlatseqatigiiffiup iluanaarutinit tunniussaasa qaffannerisigut, aningaasaliineratigut aningaasaliissutit aningaasalersorneqarsinnaassasut naatsorsuutigineqarpoq. Tamatuma apersuinermi ilanngullugu apeqqutiginnissaa ataatsimiititaliamit pisariaqartinneqarsimavoq.

2013-imi, 2014-imi aamma 2016-imi sanaartugassanut taarsigassarsiarititassat ikilineqarnerat suliffeqarfiup ukiunut qulinut pilersaarutaani sanaartugassat aserfallatsaaliinissallu ingerlanneqarnissaannut Nukissiorfiit periarfissaat sunnernerlussangikkaat naatsorsuutigineqartoq apersuinermi Naalakkersuisup paasissutissiissutigisinnaavaa. Kiisalu apersuinermi paasissutissiissutigineqarpoq Namminersorlutik Oqartussat ingerlatseqatigiiffimmik kisermaassillutik piginnittunngussappata qularutissaangitsoq aningaasaliissutissat ilaat 30 mio. kr.-it RAL-imit aningaasalerneqarnissaat.

Ingerlatseqatigiiffimmilli kisimiilluni piginnittunngornissaq Naalakkersuisunit naatsorsuutigineqarnerisooq Naalakkersuisup paasissutissiissutigisinnaangilaq. Aammalu nalilinnngorlugit aningaasaliissutigisat annaaneqannginnissaat aammalu ingerlatseqatigiiffik ukiuni arlalinni amigartooruteqarluni ingerlappat imaluunniit akiliisinnaajunnaarpat Nuummi umiarsualiviup umiarsualivittut ingerlatiinnarneqarsinnaanissaa qulakkeerniarlugit Naalakkersuisut qanoq iliulersaarnersut aamma paasissutissiissutigineqarsinnaangilaq. Akiitsut aamma aningaasaliisarnert pillugit periusissami piumasaqaatit pilersaarummi atorineqassasut aammalu sapaatip akunnerani aggersumi Naalakkersuisut tunngaviusumik aalajangiinissartik naatsorsuutigigaat Naalakkersuisup taamaallaat paasissutissiissutigisinnaavaa. Tamannali 2013-imi aningaasanut inatsisissatut siunnersuutip suliarineqarnera eqqarsaatigalugu kingusinaarpoq,

taannami ulloq 15. november akuerineqassaaq. Oqaasertaliussamik erseqqissumik paasinangitsumik imaluunniit oqaasertaliussap qanoq atorniarneqarnera pillugu Naalakkersuisut suli aalajangiinninnerat pissutigalugu itisilerneqarsinnaanngitsumik Aningaasaqarnermut Ataatsimiititaliap Inatsisartullu akuersissutiginninnissaannik Naalakkersuisut qinnuiginninnerat eqqarsaatigigaanni tunngavimusimik aalajangiinnissaq pillugu Naalakkersuisut piffissalersuinerat assut isornartoq ataatsimiititaliaq isumaqarpoq.

Sanaartugassat taama annertussusillit siuariartorfiunerannik killiffiannillu Inatsisartut ataatsimiititaliallu susassaqtut ingerlaavartumik ilisimatinneqartarnissaannik kaammattuutimi uteqqinnissaa ataatsimiititaliap pisariaqartippaa.

(Allannguutissatut siunnersuutit nr. 155 aamma 159)

Oqaasertaliussanut allannguutissatut siunnersuutit nr. 155 aamma 157-imit 160-imut **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq.**

Oqaasertaliussanut allannguutissatut siunnersuut nr. 156 **akuerineqassasoq** Aningaasaqarnermut Akileraartarnermullu Ataatsimiititaliami amerlanerussuteqartunit Inuit Ataqtigiinnit aamma Demokraatinit **inassutigineqarpoq.**

Oqaasertaliussanut allannguutissatut siunnersuut nr. 156 **itigartinneqassasoq** Aningaasaqarnermut Akileraartarnermullu Ataatsimiititaliami ikinnerussuteqartunit Siumumit aamma Atassumit **inassutigineqarpoq.**

5. Aningaasaqarnermut Ataatsimiititaliap kaammattuutai

Kaammattuut nr. 6

Naalakkersuisut ataqtigiissaarinerat ingerlatsinerallu pitsanngortinneqassasoq ataatsimiititaliamit **kaammattuutigineqarpoq**, taamaaliornikkut akissutinik naammanngitsumik imaluunniit ataqtigiissaagaanngitsunik ataatsimiititaliamut nassiussisoqaaqqunagu.

Kaammattuut nr. 7

Sanaartugassat annertuut pingaarutilillu, soorlu nutaanik mittarfiliorerit umiarsualiviliorerillu, siumukarfiunerat killiffiallu pillugit Inatsisartut ataatsimiititaliaanik susassaqtunik, taakkununga ilanngullugu Sanaartornermut Avatangiisinullu Ataatsimiititaliamik, Inuussutissarsiornermik Ataatsimiititaliamit, ingerlaavartumik ilisimatitsisarnissaq oqaloqatiginnittarnissarlu qulakkeeqqullugu Naalakkersuisut ataatsimiititaliamit **kaammattorneqarput.**

6. Allannguutissatut siunnersuutit aningaasatigut kingunissaat

Pingajussaaneerinissamat Naalakkersuisut allannguutissatut siunnersuutaasa aningaasatigut kingunissaat takussutissiami matuma kinguliani allassimapput.

Naalakkersuisut	AIS 2013	M 2014	M 2015	M 2016
	(Mio. kr.)			
IST - aappassaaneerineq	112,0	-5,2	-34,8	-8,3

IS - aappassaaneerineq	-2,3	18,1	8,8	-32,7
Naal. all. siun. – pingajussaa.	2,2	-0,8	-0,6	6,1
IST - pingajussaaneerineq	114,3	-6,0	-35,3	-2,2
IS - pingajussaaneerineq	0	17,3	8,3	-26,6

Kisitsisit akunnaallisagaapput

Allannguutissatut siunnersuutit Naalakkersuisunit saqqummiunneqartut tamarmik akuersissutigineqarpata 2013-imi angusassatut missingersuutigineqartut ima isikkoqalissapput:

IST-imi 114,3 mio. kr.-inik amigartoorneq aammalu IS-imi 39.000 kr.-inik sinneqartoorneq.

Allannguutissatut siunnersuut Suleriaaseq pillugu Ataatsimiititaliamit saqqummiunneqartuq naatsorsuinerni ilanngunneqanngilaq. Allannguutissatut siunnersuutip taassuma IS-ip aamma IST-p ataatsimut inerneranut 2013-imi 650.000 kr.-inik pitsanngoriaataassaaq.

Aningaasaqarnermut Ataatsimiititaliap allannguutissatut siunnersuutaa IS-imut aamma IST-mut sunniuteqassanngilaq.

7. Ikinnerussuteqarluni oqaaseqaat

Aningaasaqarnermut Akileraartarnermullu Ataatsimiititaliami ikinnerussuteqartut Siumut aamma Atassut aningaasanut inatsisissatut siunnersuut tamarmiusoq pillugu ima oqaaseqarumapput:

Aningaasanut inatsisissatut siunnersuummut tamarmiusumut partiit inaarutaasumik inassuteqaateqarnissaannut akileraartarnermik allanngortitsineq pillugu isumaqatigiinninnerup apeqqutaatinnissaanik aallaavitsinnut uteqqittariaqarnerput Siumup aamma Atassutip ajuusaarutigaa. Nunatsinni naalakkersuinikkut patajaatsumik ingerlasoqarneranik nunarsuarmioqatitsinnut Kalaallillu Nunaanni aningaasaleerusussinnaasunut sakkortuumik oqariartuuteqarsinnaaqulluta 2013-imut aningaasanut inatsisissatut siunnersuut pillugu nunatsinni isumaqatigiissuteqarnissamut ammarusussimavugut. Siusinnerusukkut isumaqatigiinniarluta ataatsimiinnernit oqaatsikkut nalunaarutitta uppernarsarneqarnissaat siunertaralugu pingajussaanik naapinnissarput neriorsuutigineqaraluartoq ajoraluartumik utaqqilussinnarsimavarput. Utaqqilussinnarsimavugut, tamannalu tunngavigalugu inuuniarnikkut akisussaassuseqartumik aningasanut inatsimmi sunniuteqarsinnaasimanngilagut, aningaasanut inatsimmik tapersiissagutta pisariaqartutut isigisatsinnik. Kiisalu aappassaaneerinermi partiit marluusut oqaaseqaataat innersuussutigissavagut, matumanilu immikkut akileraartarnermik allanngortitsineq pillugu allassimasut.

8. Aningaasaqarnermut Ataatsimiititaliamit inassuteqaatit

Aappassaaneerinermi sammisaq 1-p ataani allannguutissatut siunnersuut nr. 29 **itigartinneqassasoq** Aningaasaqarnermut Akileraartarnermullu Ataatsimiititaliamit **inassutigineqarpoq.**

Aappassaaneerinermi sammisaq 1-p ataani allannguutissatut siunnersuut nr. 33 **akuerineqassasoq** Aningaasaqarnermut Akileraartarnermullu Ataatsimiititaliamit **inassutigineqarpoq.**

Aappassaaneerinermi sammisaq 2-p ataani allannguutissatut siunnersuutit nr. 47 aamma 48 **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

Sammisaq 6-ip ataani allannguutissatut siunnersuutit nr. 95-imit 108-imut **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

Sammisaq 7-ip ataani allannguutissatut siunnersuutit nr. 109-imit 126-mut **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

Sammisaq 8-ip ataani allannguutissatut siunnersuutit nr. 127-imit 130-mut **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

Sammisaq 9-ip ataani allannguutissatut siunnersuutit nr. 131 aamma 132 **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

Sammisaq 10-p ataani allannguutissatut siunnersuutit nr. 133-mit 134-mut aamma 136 **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

Sammisaq 10-p ataani allannguutissatut siunnersuutit nr. 135 **akuerineqassasut** Aningaasaqarnermut Akileraartarnermullu Ataatsimiititaliamit amerlanerussuteqartunit Inuit Ataqatigiinnit, Siumit aamma Atassumit **inassutigineqarpoq**.

Sammisaq 10-p ataani allannguutissatut siunnersuutit nr. 135 **itigartinneqassasut** Aningaasaqarnermut Akileraartarnermullu Ataatsimiititaliamit ikinnerussuteqartunit Demokraatinit **inassutigineqarpoq**.

Sammisaq 11-p ataani allannguutissatut siunnersuutit nr. 137-imit 140-mut **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

Sammisaq 12-p ataani allannguutissatut siunnersuutit nr. 141-imit 142-mut aamma 147-imit 149-mut **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

Sammisaq 12-p ataani allannguutissatut siunnersuutit nr. 143-imit 146-mut **akuerineqassasut** Aningaasaqarnermut Akileraartarnermullu Ataatsimiititaliamit amerlanerussuteqartunit Inuit Ataqatigiinnit aamma Demokraatinit **inassutigineqarpoq**.

Sammisaq 12-p ataani allannguutissatut siunnersuutit nr. 143-imit 146-mut **itigartinneqassasut** Aningaasaqarnermut Akileraartarnermullu Ataatsimiititaliamit ikinnerussuteqartunit Siumumit aamma Atassumit **inassutigineqarpoq**.

Sammisaq 13-ip ataani allannguutissatut siunnersuutit nr. 150-imit 154-mut **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

Oqaasertaliussanut allannguutissatut siunnersuutit nr. 155 aamma 157-imit 160-imut **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

Oqaasertaliussanut allannguutissatut siunnersuut nr. 156 **akuerineqassasoq** Aningaasaqarnermut Akileraartarnermullu Ataatsimiititaliami amerlanerussuteqartunit Inuit Ataqtigiinnit aamma Demokraatinit **inassutigineqarpoq**.

Oqaasertaliussanut allannguutissatut siunnersuut nr. 156 **itigartinneqassasoq** Aningaasaqarnermut Akileraartarnermullu Ataatsimiititaliami ikinnerussuteqartunit Siumumit aamma Atassumit **inassutigineqarpoq**.

Sammissaq 14-ip ataani allannguutissatut siunnersuut nr. 161 **akuerineqassasoq** Suleriaaseq pillugu Ataatsimiititaliamit **inassutigineqarpoq**.

Sammissaq 15-ip ataani allannguutissatut siunnersuut nr. 162-imit 163-imut **akuerineqassasut** Aningaasaqarnermut Akileraartarnermullu Ataatsimiititaliamit **inassutigineqarpoq**.

Allannguutissatut siunnersuutit pingajussaaneerinissamut saqqummiunneqartut Inatsisartunit taasissutigineqareerneranni inatsisissatut siunnersuut iluserilikkamisut iluseqarluni **akuersissutigineqassasoq** Aningaasaqarnermut Akileraartarnermullu Ataatsimiititaliami **amerlanerussuteqartut** Inuit Ataqtigiit Demokraatillu ilaasortaataasa **inassutigaat**.

Inatsisissatut siunnersuut tamarmiusoq itigartinneqassasoq Aningaasaqarnermut Ataatsimiititaliami ikinnerussuteqartut Siumup Atassutillu ilaasortaataasa **inassutigaat**.

Taama oqaaseqarluni aningaasanut inatsisissatut siunnersuut Aningaasaqarnermut Akileraartarnermullu Ataatsimiititaliap Inatsisartunut pingajussaaniigassanngortippaa.

Andreas Uldum,
siulittaasoq

Olga P. Berthelsen

Naaja Nathanielsen

Aqqaluaq B. Egede

Siverth K. Heilmann

Per Berthelsen

Finn Karlsen